



類苑叢寶

1493
22-4

共



門1加3
號1493
卷22-4



類苑叢寶卷之七

地道門



國都

都者國君所居人所都會也邑猶他聚會之稱也釋
惟王建國辨方正位體國經野設官分職以為民極

天官

土方氏以土圭攻日景以土地相宅而建邦國都鄙夏官

匠人營國方九里旁三門國中九經九緯經涂九軌左祖右社

面朝後市冬官制國不過千乘都城不過百雉坊記凡邑有宗

廟先君之主曰都無曰邑左傳京師者天子之居也京大也師

衆也傳天子畿方千里曰甸服甸服之內曰京師世紀天子

所宮曰都世紀崑崙東南方五千里謂之神州中有和羹鄉方

夏卷之三

一

三千里五岳之城帝王之宅聖人所生也古論崑崙東南有赤
縣之州風雨有時寒暑有節苟非此土南則多暑北則多寒東
則多陰故聖人不處焉張衡天子以四海為家故所居曰行在
所漢書都邑曰天莊日畿

歷代都

伏羲都陳神農亦都陳今陳州又營曲阜齊州黃帝
都涿鹿幽州或古有熊鄭州少昊都窮桑魯地顓頊都高陽
地帝嚳都亳一曰都高辛偃師堯始封於唐定州後徙晉陽
原即帝位都平陽晉州舜都蒲阪今蒲州禹本封於夏為夏伯及
舜禪都平陽或在安邑在蒲湯都亳仲丁遷囂曰教教倉河
夏甲居相相州祖乙居耿河東及盤庚五遷復都西亳偃師周

大王都豐武王都鎬周公相成王以豐鎬偏處西方乃營洛邑
平王東遷居洛秦非子始封於秦隴西孝公徙咸陽漢都長安
光武都洛陽晉都洛陽至永嘉南居建康宋齊梁陳並居建康
隋都長安唐都長安宋都汴南宋都臨安元都燕

關市

重門擊柝以待暴客蓋取諸豫易仲夏之月關市無
索月令司關掌國化之節以聯門市凡貨不出於關
舉其貨罰其人國凶荒則無關門之征周禮古之為關也將以
禦暴今之為關也將以為暴孟子關譏而不征孟子關在境所
以察出禦入蔡邕月市買賣所也說文市持也言交易而退持
以不匱也風俗關者市之垣闔者市之門肆所以陳貨鬻之物

居所所以置貨鬻之物注古今日中為市致天下之民聚天下之貨交易而退各得其所易建國必面朝而後市質人掌買賣貨劑注契券也司市掌市之治教刑政量度禁令大市日昃而市百族為主朝市朝時而市商賈為主夕市夕時而市販夫販婦為主主言其多司市掌憲市之禁令禁其鬪器者與其亂者出入相陵犯者以屬遊飲食于市者若不可禁則搏而戮之周禮掌戮凡殺人者監諸市肆三日刑盜于市並同市中空地謂之廛注市廛而不征法而不廛則天下之商皆悅而願藏於其市矣市不貳價雖使五尺之童適市莫之或欺古之為市者以其所有易其所無有賤丈夫焉必求龍斷而登以左右望而罔市

利故從而征之征商自此賤丈夫始矣並孟子一關之市必立之平揚子市井相與言則以財與利揚子刺綉文不如倚市門前食貨志九市開塲貨別墜分西都市樓謂之旗亭京賦列肆雲曼市賦大儈市儈也淮南儈書者皆當着巾白帖額題所儈書者及姓名一足着白履一足着黑履晉令半賈而賣注本直千錢者止得五百也晉讀曰價前食貨志亡者取倍稱之息注取一償二為倍稱良賈不為折閱不市注閱賣也謂損所閱賣之價者子老子度關周元年老子之度關令尹喜先勅門吏曰若有老公從東來乘青牛薄板車者勿聽過關其日果見老公乘青牛車來度關吏入白之喜曰諾公今來矣我見聖人矣即帶印綬

出迎設弟子之禮

關中記

置關用傳

景帝四年復置諸關用傳

出入師古曰古者或棨刻木為合符或用繒帛張宴曰傳信也

兩行書繒帛分持其一出入開合之乃得過謂之傳終軍棄繻

終軍初從濟南嘗詣博士入關關吏與軍繻軍問以此何為吏

曰為復傳還當以合符軍曰大丈夫西遊終不復還棄繻去後

軍為謁者使行郡國建節東出關關吏識之曰此使者乃前棄

繻生也乘車出關後漢郭丹南陽人少從師之長安後死入

陳洮買八關符以入更始二年以丹為諫議大夫持節安集南

陽去家十二年果乘高車出關更始敗歸鄉里太守杜詩請為

功曹丹薦人自代而去詩歎息勅以丹事編署黃堂以為後法

九泥封關

隗囂將王元謂囂曰請以一丸泥為大王東封函

谷關

燕丹去秦夜到關關門不開丹為鷄鳴衆鷄

皆鳴遂得逃歸同孟嘗君事

鬼門關

交趾有鬼門關多瘴諺云若度

鬼門關十去九不還

市弗飾價

孔子與聞國政三月粥羔豚

者弗飾價

百里奚舉於市

伍子胥出

昭關吹篪乞食於吳市

歌於市中

高漸離擊筑荆軻和而歌

於市**中以屠居市**

聶政殺人避仇以屠為事居市井

毛公薛公遭戰國之亂二人俱以處士隱於邯鄲市

毛公隱為

博徒薛公隱於賣膠

為市門卒

梅福變姓名為具市門卒

韓康伯賣藥於長安市中不二價

上谷市

景公欲更晏子

之宅曰子之宅近市辭曰小人近市得所求小人之利也**舞鶴**
吳王愛女舞白鶴於市令萬人觀之因以為殉春秋**徒木**秦
公孫鞅之法令恐人失信乃立三丈之木於市南門徙置北門
者與千金**懸金**呂不韋著呂氏春秋暴之咸陽市懸千金其
上有能增一字者與之千金時無能者**槐市**元始四年起明
堂辟雍長安城南北為會市但列槐樹數百行為隙無墻屋諸
生朔望會此市各持其郡所出貨物及經書傳記笙磬器物相
與賣買雍容揖遜或議論槐下**市吏公廩**大將軍霍光秉政
諸霍在平陽奴客持刀兵入市鬪變吏不能禁及尹翁歸為市
吏莫敢犯者公廩不受饋百賈畏之 光武以祭遵為市令上

家人犯法連格殺之**官市**德宗時宦者主官市嘗置數十百
人閱物屢左謂之白望無詔文驗覈但稱官市則莫敢誰何大
率與直十不償一諫臣交章列上皆不納**花市**揚州人無貴
賤皆喜戴花開明橋之間拂旦有花市焉**亥市**分寧縣本常
州亥市也西蜀曰亥市如瘡疾間日作也江南惡以疾稱故止
曰亥市 又荆吳俗取寅申巳亥日集於市故去**云市**蜀中
春月村市聚為歡樂為蚕市坡詩云蚕市光陰非故國**海市**
坡去子聞登州海市舊矣以不見為恨乃禱於海神庙明日見
焉 張昌儀持寵請托如市李祺曰此海市蜃樓也**霧市**見
霧門**罷市**羊祜平荊州人皆號勸罷市**西園市**漢靈帝賣

官西園閣如市 鄭崇曰臣門如市臣心如水市虛 南越中
謂野市曰虛蓋市之所在有人則滿無人則虛峒岷詩去綠荷
包飯赴虛人

城郭

城以盛民也墉城垣也說文禹作城疆者攻弱者守
政者戰城郭自禹始也博物志城雉者何五板而堵五
堵而雉百雉而城公羊管子曰內為之城外為之郭釋名去城
盛也盛受國都也郭廓也廓落在城外也風俗通曰郭或謂之
郭郭者亦大也 吳越春秋曰鮌築城以衛君造郭以守民此
城郭之始也 天子之城高九仞公侯七仞伯五仞子男三仞
五經異義天子之城千雉高七雉公侯百雉高五雉子男五雉高三

雉公羊注

城上垣謂之睥睨言於孔中睥睨非常也亦曰睥睨也
禪助城之高也亦曰女牆言其卑小比之於城若女子之於丈
夫也說文所謂堞者亦女牆也釋名無戎而城讐必保焉左大
道既隱天下為家城郭溝池以為固禮古者大國過小邑必飾
城而請罪禮也詩城修守備也 崑崙山有曾城九重雉漢書
曰有石城十仞湯池百步帶甲百萬而無粟不能守也 苟不
能衛城無益也左三里之城七里之郭環而攻之而不勝是天
時不如地利也孟秦二世欲漆長城優旃曰善哉漆城蕩蕩寇
來不得上漆固易耳難為陰屋甫二世乃止 城上垣曰堞樓
曰麗譙下有門曰譙門望樓無屋曰櫓秦所築長城土色皆紫

漢塞亦然故稱紫塞 王肅表曰夫城之有郭猶骨之有皮表裡各異則保障不完皮骨分離則一體不具 穀梁曰城以保民為之也民衆城小則益城益城無極九城之志皆機也 門戶道橋謂之啓城郭墻塹謂之塞開閉之急不可一日而闕

卧龍城

凉州城有卧龍形故名南北七十里東西三十里本

匈奴所築也

下魚城

狼山縣東六十里有山名下魚城四面

絕崖唯兩道可上皆險峻山上周迴可二十里有林木池水入田種於山上昔永嘉亂十一人登此避賊守之經年食盡取池魚擲下與賊以示不窮賊遂退散因此名為下魚城 **哭崩城** 齊人杞梁襲莒戰而死其妻無所依乃枕夫屍於城下而哭之七

日而城崩妻遂投淄水而死

夫人城

晉朱序鎮襄陽符堅攻

之序毋見城西北角當先壞領百餘婢并女丁料築城二十餘

丈賊攻西北角果潰衆守新城賊引退號為夫人城 **不夜城**

曹操征馬超為超騎所突營不得立又多沙不可築城婁子伯

曰今天寒可起沙為城以水灌之一夜而成

白帖

不夜城 古

者日夜出於東萊故婁子立此城以不夜為名

地理志

芙蓉城

石曼卿死有見之紫騮如飛者曰我今為仙所主芙蓉城

漢元帝初築長安城城南為南斗形北為北斗形呼為斗城

城

秦華長城延袤萬里

齊唐邑守并州或曰并州金城湯

池帝曰非也唐邑是金城

北史

唐太宗曰李勣守并突厥不敢

南賢於長城遠矣

漢武帝築之

兵王閩

閩使伍子胥相土嘗水象天法地尊為大城四十里小城十里

開八門以象八風

梁孝王所築鼓倡節杵而後下和之者稱睢陽曲今之樂家有

睢陽曲是其遺音也

石角外向如雉堞然惟一門可通內有田百頃泉九十九眼

儀

以問巫巫曰隨龜筮之效果成

宗時為化州司法參軍歸值建城盡以家之磚石輸官佐其費

有司以聞賜勅有哲夫成城保衛鄉里之褒

之險城

鼓倡節杵

在仇池山

張

輸石

宋上猶人

鍾鼎高

白草城

塞外有

白草城古詩白草城中春不入黃花戍上鴈長飛

始皇遣徐福設童男女千人渡海求蓬萊仙因築城僑居童男

女號小兒城一名千童城

在保定府漢王譚不徒王

莽與五子避難于此先武封其子五人為侯名其城曰五大夫

城

唐高駘徒劔南西川節度使成都城歲壞駘易以磚甃

固負城丘陵悉墾平之以便農桑訖工城未有名駘益得大畜

曰畜者養也濟以剛健篤實光輝日新吉孰大焉文宜去下存

上因名大玄城

夏主赫連勃勃以叱干阿利須為

將作大匠葺夷夏十萬人等都城于朔方黑水之南曰朕方統
一天下君臨萬邦新城宜名統萬阿利性巧而殘忍蒸土等城
雖八一寸即發尋者而更等之馬武州塞將城而崩者數矣有馬馳走周旋父老異之因依以等
城乃不崩遂名焉也三牛城即鳳陽舊城淮濠多水灾牛畜
故以歷之宋郡守梅詢初夢三牛闔于庭又有人舞相公上謁
及得濠州見廨有三石牛既而呂夷簡來為俸恍如夢中五羊
城在廣州趙佗所築周回十里初有仙人騎五色羊執六穗
秬而至故名五羊魏魏初知廣州于城一角忽頽
見一古磚有四大字云委于鬼工乃魏字也公感其字大等新

之後羅遠未幾儂智高寇廣州外城一擊而圯獨于城堅民賴
以生賊平朝廷以公前知有備加諫議大夫并知廣州酒
酒城在蘇州壇塘畔相傳吳夫差祭子胥處臨祭勸酒故名酒
一名壇城雉城南陽府城北有雉城秦文公時有陽伯者逢
兩童子化為雙雉其雄西飛上陳倉其雌東飛止此故名雉城
古者苑囿必於東方蓋東方萬物所生之地也苑蘊
也言薪蒸所蘊積也說文苑有垣曰囿囿猶有也
甘泉苑在長安城西漢武所置緣山谷行至雲陽三百八十
里西八右扶風凡周迴五百四十里苑中起宮殿臺閣百餘所
有鳩鵲觀御宿苑林苑在金陵東址吳時創一名槐花苑

長湖池

在蘇州太湖北岸闔閭遊獵處

即秦舊苑

武帝開周襄三百里內有離宮七十所

博望苑

定太子既冠

武帝為博望苑使通賓客

博望苑

在南陽漢明帝創周圍

百餘里靈帝校獵於此

樂遊苑

在金陵在晉為樂園元嘉中

為此苑後改名樂遊苑

靈苑

漢靈帝作鼻圭靈苑司徒

楊賜諫之思

思苑

漢文帝為太子立思賢苑以招賓客苑中

有堂皇六所

瓊林苑

在開封府宋嘗以道士於此

在開封宋人號東御園

東御苑

在金陵齊東昏侯為之

隋煬帝等之周三百里其內為海周十餘里海中為方丈蓬萊

諸山出水百餘丈

滎澤苑

在洛陽城西

宮殿

宮穹也屋見於垣上穹崇然也釋名蒼頡篇曰殿大

堂也商周以前其名不載案史記秦始皇始作前殿

蔡邕云禁中門閣有禁非侍御之臣不能安入孝元皇后父名

禁避之故曰省中師古曰省察也言入此中皆當視察不可安

也漢書宣政門內有宣勅殿東有東上閣門西有西上閣門故

以掖稱長安服虔曰掖門正門之旁小門如人臂掖也楓槐

被宸何晏宸帝居屋宇也言植此木於宸中木擁槍纍以為

儲胥注槍纍作木槍相纍為柵也儲胥武帝作迎風館於甘泉

宮後如靈寒儲胥二館丹地注以丹淹泥塗殿上地青瑣

注刻為瑣文而青塗也西清注西相清閑處也殿堂象東

井形刻作荷菱水物所以厭火通俗皎皎白間離離列錢晨光
內照流景外燧注間窓也以白金之畫以錢文 端門殿之正
門寧者謂路門之外屏樹之內人君視朝寧立之處曲禮曰天
子當寧而立 宮門雙闕釋名云闕在門兩旁中央闕然為道
也然則其上懸法象其狀巍然高大謂之象魏使人觀之是觀
與象魏闕一物而三名也以門之相對為雙故名雙闕 闕觀
也古者每門樹兩觀於其前所以標表宮門也其上可居登之
則可徧觀故謂之觀人臣將朝至此而書其所闕多少故謂之
闕其上皆丹壁其下皆畫雲氣仙靈奇禽恠獸以昭示四方焉
蒼龍闕畫蒼龍白虎闕畫白虎玄武闕畫玄武朱雀闕畫朱雀古今

昔堯有貳宮撫宮湯有鑪宮周有蒿宮鄭宮春宮秦有斬年宮
信宮梁山宮漢有沛宮甘泉宮龍泉宮太一宮思子宮後漢有
南宮北宮胡桃宮魏有鄴宮具有太初宮昭明宮此諸宮皆範
金合土而為之以為貴也亦猶天文之有紫宮文昌及五宮神
仙之有金玉琉璃宮矣

蒿宮 大戴禮曰周時德澤和洽蒿茂大以為宮柱者名曰蒿

宮梧宮 說苑曰楚使使聘齊齊王享之梧宮使者曰大哉梧

乎王曰江海之魚吞舟况大國之樹也美人宮 越絕書曰美

人宮周五百九十步土城者勾踐所習教義人西施鄭旦宮室

碣石宮 史記曰騶子之燕昭王擁彗先驅請列弟子之座而

受業等碣石宮親往師之首山宮

漢書曰武帝六年久幸雍

回中春作者山宮郊門宮

上祠神人于郊門宮若有向生拜

者作郊門之歌也壽宮

上幸河東之明年正月鳳凰集設祠

於所集處得玉寶起延壽宮並同

鄴宮

晉書曰高堂隆刻鄴

宮屋材去後若干年當有天子居此宮惠帝止鄴宮治屋者土

剥更泥始見刻字計年正合

桂宮

武帝起桂宮周匝十里內

有光明殿走狗臺為七寶林雜寶案厠寶屏風列寶帳設於桂

宮時人謂之四寶宮

越絕書曰今大守舍有春申君

所造後殿屋以為逃夏宮

集靈宮

漢武帝巡省五岳裡祀豐

備故立宮其下號曰集靈宮

養德宮

趙王如意宮號也未央

宮

高祖七年蕭何治未央宮立東闕北闕前殿武庫大倉上

見壯麗甚怒謂何曰天下洵洵何治宮室過度也何曰非壯麗

無以重威 未央宮有承明殿即著作之所

置酒前殿奉王卮為太上皇壽殿上群臣皆呼萬歲

長揚宮本秦舊宮漢修飾之以備行幸有垂楊殿因以為宮名

門曰射熊觀秦漢遊獵之所也成帝行幸長揚宮從胡客大拔

獵甘泉宮

始皇作漢武廣之周十九里

建章宮

武帝太初

元年乙酉拓梁災於是作建章宮度為十門萬戶前殿度高未

央其東則鳳 高二十餘丈其西則商中數十里虎園其北治

大池漸臺高二十餘丈名曰太液池中有蓬萊方丈瀛洲象海

中神仙龜魚之屬其南有玉堂壁門之屬立井榦樓高五十丈
輦道相屬焉**長信宮**漢太后之宮也又名長樂宮**長秋宮**
明帝時建皇后所居之宮秋者萬物成熟之初故名**金馬門**
金馬門宦者署也在未央宮漢武得大宛馬以銅鑄成立於門
因以為名**化人宮**周穆王時西胡有化人來王執化人祛騰
而上天乃即化人之宮構以金銀絡以珠玉**蘭池宮**始皇微
行與武士四人俱夜出至蘭池宮逢盜見襄武士擊殺盜**九成宮**
宮本隋仁壽宮唐太宗修而避暑**隆真宮**宋太宗遣舍人
王龜後就於南山下尋宮真君忽降曰此地乃建上帝宮闕之
地不可易也元三年宮乃成題曰上清太平宮**仁壽宮**隋文

帝營仁壽宮於岐州之北使楊素監之於是夷山堙谷以立宮
殿崇臺累榭宛轉相屬**仁壽宮**隋煬帝敕宇文愷封德彝營
顯仁宮設大江之南五嶺以北奇材異石輸之洛陽又求海內
嘉木異草珍禽怪獸以實苑囿**玉華宮**唐貞觀中營玉華宮
務為儉約惟寢殿覆瓦五椽**宮**武帝位五柞宮於盩厔縣宮
有五柞樹蔭數里**宮**在江西省城內宮前有井水黑色
其深莫測與江水相消長鐵柱立其中相傳晉許旌陽所鑄以
息蛟害者**飛山宮**貞觀十一年作飛山宮魏徵上疏曰宜撤
其峻宇安於卑宮若以亂易亂殃咎必至**溫泉宮**在驪山之
北貞觀八年建天寶六載改為華清宮**興慶宮**在西安府唐

南內也有文泰南薰大同華殿上陽宮在河南府闕下

時建太和宮在西安府南山上唐高祖建太宗改曰翠微內

有含風殿紫微宮在堆安府熙寧中楊傑作記嘗有神仙來

遊題詩於壁筆跡蹟八刮之不滅又有李公麟畫猴戲馬馬驚

而圍人鞭之時梅為奇華細腰宮在巫山縣林襄王所遊之

地或曰莊王建延喜宮紹興九年和議成太后有歸期高宗

預作此宮德壽宮紹興未建高宗傳位孝宗退處於此孝宗

傳位光宗改曰重華光宗傳位寧宗又改曰壽康慶元殿漢

景帝子魯恭王餘所立也王好治宮室因魯僖基兆而營焉遭

漢中微未央建章之殿皆墮壞而靈光巋然獨存金華殿翰

林院在禁中乃人主燕居之所玉堂承明金鑾三殿皆在其間

唐玄宗召見李白於此梅華殿晉謝安作新宮造殿少一梁

時有梅木流至石頭城下因取為梁及殿成乃畫梅花於上以

表瑞也檣柱殿陳高祖作太極殿少一柱忽有樟木六十圍

長四丈餘自流於陶家渚遂取以造殿紫宸殿漢之前殿周

之路寢天子所以饗萬國朝諸侯披香殿唐蘇世長待宴披

香殿酒酣進言曰此場帝位耶何彫麗如此高祖曰卿諫似直

然詐也豈不知此殿我所營乃云場帝耶對曰臣但見瓊宮瑤

臺非受命聖人所為者帝重其言延英殿唐延英殿在宣政

殿之東乃宰相啟事之所憲宗朝李絳當盛夏對延英殿帝汗

浹衣絳欲起出帝曰欲與卿講天下事乃其樂也又文宗銳意
於治每延英對宰臣率漏下十一刻宗廟圖漢武帝未誕之
時景帝夢一赤彘從雲中直下入棠蘭閣帝覺而坐於閣上果
見赤氣如烟霧來蔽戶牖望上有丹霞翳蔚而起乃改棠蘭閣
為猗蘭殿後王夫人詆武帝於此在洛陽唐宣宗敦睦兄弟
作雍和殿於十六宅數臨幸置酒作樂在洛陽顧况在洛
乘閑遊苑中水上得大桐葉有詩曰一入深宮去年年不見春
聊題一片葉寄與有情入明日於上游亦題杏葉泛之波中曰
花落深宮鶯亦悲上陽宮女斷腸時帝城不禁東流水葉上題
詩寄與誰後有客尋春苑中又於杏葉上得詩云一葉題詩出

帝城誰人酬和獨含情自嗟不及波中葉蕩漾尋春取次行
唐僖宗時有于祐晚步禁溝拾一紅葉上有詩云流水何太急
深宮盡日閑殷勤寄紅葉好去到人間祐復題去曾聞葉上題
紅怨葉上題詩寄與誰祐後娶一宮人韓氏於祐書帙中見一
紅葉驚曰此吾所作吾水中亦得紅葉即祐所題詩於是相對
感歎曰事豈偶然莫非前定也戰袍得詩開元中賜將軍士
大夫纈衣製於宮中有兵士短袍中得詩曰沙場戰戍客寒苦
若為眠戰袍經手作知落那誰邊留意多添線含情更著綿今
生已過也重結後生緣兵士以詩白帥進呈明皇以詩徧示宮
中曰作者勿隱不汝罪也有一宮人自言萬死明皇深閱之遂

以嫁得詩者謂之曰吾與爾結今生緣邊人感泣 唐僖宗朝
自內製袍千領賜塞外吏士神策將軍馬直於袍繫中得金鎖
一枝詩一首云玉燭製袍夜金刀呵手裁鎖情寄千里鎖心終
不關馬直貨瑣于市為人告其將併得詩奏聞僖宗令馬直赴
闕以宮人賜直為妻 **言詞** 有士人家收江南李後主書一詞
云馮延巳換詞云銅壺滴漏初晝高閣鷄鳴半空催啓五門金
鎖猶垂三殿蒸籠塔前御柳搖綠仗下宮花散紅鴛鴦數行曉
日鸞旗百尺春風侍臣踏舞重拜聖壽南山永同 **觀風行殿**
隋宇文愷揣煬帝意造觀風行殿離合為之下施輪軸推移倏
忽

官廨

漢建尚書百官府名曰南宮蓋取天上南宮大微之
象 其官司之別曰省曰臺曰寺曰監曰衛曰府
周禮以八法治官府百官所居曰府 近代通謂府廷為公衙
即古之公朝也字本作牙訛為衙軍前大旗為牙出師則有建
牙之事軍中聽號令必至牙旗之下 寺者嗣也治事者相嗣
續於其中也 侯鯖 凡官寺吏卒率以晨晡兩時致禮俗呼衙府
古有之而稱謂訛也 漢繁 諸校列坐堂皇註室無四壁曰皇
古詩蜜蜂之辭曰為為華華雖無官職一日兩衙則凡官寺日
再聽事吏卒因之亦致其恭天子御正朝亦名正衙不知何始

藝文類聚

雀集

漢黃霸為相京兆尹張敞舍鷓雀飛集丞相府遂以為

神雀

聽事鳴蛩 鷓跖集河中府有綠莎廳事唐治平中好事

者常加澆慨王禹偁送柴諫議任河中府詩綠莎聽事舊鳴蛩

解舍避喧

晉羅含字君章為相州別駕以才學知名以解舍

解

喧擾自於城西小湖安茅屋伐樹為牀織葦為席而居

解

梁呂僧珍世居廣陵後為木州刺史舊宅在市北前有督

郵解鄉人咸勸徒解以益宅僧珍怒曰豈可徙官解以益私宅

乎儼舍而居

石林燕語國初京師職事官舊皆無公解雖宰相執政官亦儼舍而居每遇出省或有中批外奏急速文字則

省吏徧持於私第呈押既然稽緩又多所泄漏

成公宇

寇

葉公謫道州司馬素無公宇百姓聞之競荷瓦木不督而會公

宇立成頗有寇壯守土者聞於朝遂有海康之命

官舍得狸

晉

殺之性遠絕

宋徐孝先為都官尚書自晉以來尚

書寮皆隸管屬居省中多有鬼性每夜或見人着衣冠從中

出或門自開闔見者多死尚書周確卒於此省孝先代確居之

經兩載妖變皆息

官舍鬼 梁傅昭歷位左戶尚書安成內

史郡自宋來兵亂相接府舍稱凶每昏旦間人鬼相觸在任者

鮮以吉終及昭至有人夜見甲兵出曰傅公善人不可侵犯乃

騰虛而去

自是郡遂無患

晉羊枯都督荊州長史

相繼死傳言有鬼恠害人皆云宜一毀舊府枯曰死生有命富貴在天救征鎮禁斷之

官驛 館客舍也文說十里一長亭五里一短亭六帖凡國野之道十里有廬廬有飲食三十里有宿宿有路室路

室有安五十里有市市有候館候館有積周禮九諧候八玉則逆勞于畿及郊勞視館致館上同克勝則使傳遽告功於玉釋文云以車曰傳以馬曰遽詩註見人不能館不問其所舍曲禮

四馬高足為直傳四馬中足為馳傳四馬下足為乘傳一馬二馬為軺傳急者乘一馬曰一乘傳傳者若今之驛古者以車謂之傳車其後又單置馬謂之驛騎

私馬夫車 漢王溫舒為河內守具私馬五十匹自河內至長

安以奏事置驛謝賓 鄭當時字莊陳人以任俠自喜為太子

舍人五日一洗沐常置驛馬於長安諸郊詣謝賓客夜以繼日常恐不徧欲得劉公

亭吏不知為寵也止言曰整頓以待劉公寵不言而去時人稱其長者不納趙孝

王恭時趙孝父為田禾將軍孝以父任為郎嘗告歸步擔欲止郵亭亭長不納問曰聞田禾將軍子嘗過何時至孝曰尋將到取名苦誑

善誑驛在襄陽齊使淳于髡獻鵠於楚至此地放之揭空龍見玉曰臣不忍鵠之渴出而飲之俄飛去吾欲死恐人譏王以為歎之故令士自殺買而代之

是欺吾王也楚王厚賜而歸驛名取此段名驛元稹陽城

驛詩商有陽城驛名同陽道州陽公恨已久感我決交流祠曹

諱羊祐此驛何不伴我欲避公諱名為避賢郵高

元裕以右補闕召道出商州會方士趙歸真擅乘驛馬元裕詆

之曰天子置驛甯敢疾驅耶命左右棄之還具以聞市健馬

唐盧鈞拜華州刺史開輔驛馬疲耗鈞為市健馬率三歲一易

自是無乏事又王叔為商州刺史州有治賦羨銀契一無所取

惟市馬以供驛用莫賦定唐劉晏字士安諸道巡院皆募駝

足置驛相送飛驛建營唐馬周建白置飛驛以速警急又天

子東巡裴耀卿置二梁十驛李吉甫請起自夏州至天德復驛

堠十一區以通緩急夢筆驛在應天府東八里治亭昔江淹嘗宿此夢見文章

樓 說文曰樓重屋也 釋名曰樓言牖戶之間有射孔高 明觀遠樓樓然也 譙門謂門上為高樓以望耳樓一

名譙故謂羨麗之樓為麗譙

飛臺樓 在卧龍山頂范蠡為勾踐立此樓以象天門以歷吳

井幹樓 公孫卿言仙人好樓居黃帝時為十二樓以候神人

帝乃立神明臺井幹樓高五十丈白雲樓闔廬所作也皇天

樓 老子廟有皇天樓九柱樓靜念樓皆畫仙人雲氣黃鶴樓

荀瓌字叔偉憇樓上望西南有物飄然降白雲漢乃駕鶴之賓

也賓主歡對辭去跨鶴騰空眇然煙滅傳異鳳陽樓幽明錄

曰鄴城鳳陽門五層樓去地二十丈長四十丈廣二十丈安金鳳凰二頭於其上頭飛入漳河清浪見在水底一頭今猶存

夫雲樓魏明帝所建極精巧先稱平衆材輕重當宜然後造

即便頽壞宋樓隋煬帝為江都之遊浙人項昇進新宮圖帝

愛之如圖營建曰使真仙遊此亦當自迷唐樓唐元宗於

宮西南置樓其西書曰花萼相輝之樓南曰勤政務本之樓

英樓高宗命英公李勣伐高麗既破上於苑中樓上望之號

望英樓五鳳樓梁太祖即位羅紹威取魏良材建之儀鳳樓

晉總章觀有此樓南有翔鳳樓景雲樓宋華林園造此樓

歸鴻樓在揚州城東歸鴻樓在長沙宋楊時建落星樓

在金陵吳大帝創三層樓雲樓在荊州宋臨川康王置

唐韓建為鎮國節度使昭宗幸其鎮登樓望京師悲歌

泣下岳陽樓滕子京重建岳陽樓都俯稟落成之日于京云

落甚成待痛飲一場凭欄大慟十數聲而已于京果死於岳州

燕子樓李德裕從劍南西川建此樓燕子樓張尚書有愛

妓曰盼盼尚書既沒張氏舊第有小樓名燕子盼盼念舊愛而

不嫁居是樓十餘年幽獨悵然秦樓蕭史善吹簫秦穆公以

女弄玉妻之殺弄玉吹簫作鳳鳴公為作鳳樓夫妻居其上鳳

凰來集一夕皆隨鳳去書樓田弘正造樓聚書萬餘卷節樓

唐節度使八州縣等節樓迎以鼓角南樓 庾亮乘月登南樓

層樓 層吐氣成樓臺 張昌宗請托如市李湛曰此海市層

樓耳 何樓 趙宋國初京師有何樓其下所賣多偽故名綠珠

樓 石崇有妓曰綠珠孫秀求之不得秀矯詔收崇綠珠自投

樓下而死虞氏樓 虞氏高樓臨路飛禽適墜腐鼠中俠客俠

客滅其家列子 七重樓 西域尼婆羅宮中作七重樓覆銅瓦

楹柱皆雜寶四隅置銅槽自金龍口繳水仰注槽中律樓

武昌府治東南子城上有焦度樓南史宋明帝為武陵王時參

軍沈攸之起兵至夏口度與力戰城賴以全呼為焦度樓百天

樓 洛陽城西北有樓高百尺魏文帝造又南唐王宮中建百

尺樓召群臣視之蕭儼曰恨下無井唐主問其故對曰恨不及

景陽樓耳唐主怒貶儼舒州迎仙樓 高駢造迎仙等樓皆高

八十尺飾以金玉侍女衣羽衣新聲度曲以擬鈞天祈與仙接

鶴雀樓 在蒲州城上勝賞樓 吳興白蘋洲北有白蘋亭唐

貞元中建宋太守趙君旣新此亭復建樓於側名勝賞景樓

在眉州北塘上東坡有記鍾乳樓 在太原府有阜屹然狀若

鍾乳上建重樓甚宜遊眺觀稼樓 在應天府梁武帝建觀稼

樓 在都摩訶池上蜀王秀所建觀稼樓 在應天府齊武帝

建令宮中七夕登樓穿針擊斷觀稼樓 在巴縣馮介詩座上擊瓦

清似玉看日樓 在登州古島夷之地酒樓 在齊寧州南城

上李白與賀知章觴之於此亦曰李白樓在襄陽府

梁昭明太子所建聚賢士庾肩吾劉孝威徐陵等十餘人

號高齋學士注選於此夕陽樓在開封府春風樓在南昌

府宋况志寧詩晴日遊絲拂盡欄酒甯輕颺碧雲端春風蝴蝶知何

處總切江南曲已殘八詠樓在全華府沈約建有八詠詩李易

詩千古風流八詠樓江山留與後人愁水通南國三千里氣壓

江城十四州萬卷樓在保定府元首帥賈輔建以經傳子史

百家衆流法書名畫別為九等置其上又邀致郝經等堂於樓

側居之盡界以書肆其觀覽白雪樓在安陸州下臨漢水取

宋王陽春白雪之義劉賓客詩江上樓高十二梯梯梯登遍與雲

齊人從別浦經年去天向平蕪儘眼低寒色不堪長黯黯秋光

無奈更凄凄闌干曲盡愁無盡水正東流月正西無

為州大安門上有稻孫樓宋米芾秋日登樓燕集見田口禾青

可愛問諸老農曰稻孫也稻已獲得雨復抽餘穗芾喜而名樓

景蘇樓在績溪縣舊秋風堂宋紹興間邑宰曹訓慕前令蘇

轡之賢摹其遺像及所為詩鑄於石建此樓貯之名曰景蘇又

山東長山縣有懷范樓金時建謂思范仲淹也唐莊宗患

宮中暑濕不可居欲得高樓以避暑乃遣宮苑使主允平營之

郭崇韜曰願陛下無忘創業之難常如河上時則可使繁暑坐

變清涼莊宗默然竟使允平建樓通德樓在開封府城西廓

門外宋時士大夫於此餞別白鶴樓 贛州八境臺北有白鶴

樓蘇東坡詩白鶴樓前翠作堆縈雲嶺外若為開故人應在千

山外不寄梅花遠信來湧金樓 杭州府城西有湧金樓宋郡

守徐鑄建望京樓 唐崔日知歷職中外恨不居八座於東都

廳後起一樓與尚書省相望號望省樓又開封府西門有望京

樓唐令狐綯有詩望樓 唐李陽題名於昭慶縣樓韋蟾留

詭曰渭水秦川拂眼明希仁何辜寡詩情只因學得虞姬塔書

字纔能記姓名月波樓 在嘉興府西北城上宋元祐中鄭獬

有詩野色更無山斷絕天光真與水相通張伯玉詩風光似逐

水仙去物色如從雲漢歸東坡樓 東坡聚遠樓詩無限青山

散不收雲奔浪捲八簾鈞直將眼力為疆界何帝人間萬戶侯

東青樓 在松江府青龍江上元都水監任仁發建楊維禎有

詩東青樓 在太原府繁峙縣南中舊為真武廟元縣尹李德

輝改今名仲宣樓 在荊州當陽縣城上十三樓 十三間樓

在杭州西湖之北岸東坡南柯子詞山與歌眉歛波同醉眼流

遊人都上十三樓不羨竹西歌吹古揚州竹樓 在黃州循樓

循樓 建中二年德宗發京西防秋兵萬二千戍關東御望春

樓宴勞之神策將士獨不飲上使詰之其將楊惠元對曰臣等

發奉天軍帥張巨濟戒之曰此行大建功名凱旋之日相與為

歡尚未捷勿飲酒故不敢奉詔及行有司緣道設酒食獨惠元

所部餅壘不設上深嘆之賜書獎勞登樓清嘯劉琨在晉陽嘗為胡騎所圍數重現乃乘月登樓清嘯賊聞之皆悽然長歎棄圍而走

閣

說文樓重屋即閣也 **招靈閣** 漢武帝起招靈閣有神

女留玉釵與帝帝賜趙婕妤好至昭帝元鳳中宮人猶見

此釵共謀欲碎及視釵匣惟見白燕升天後宮人常作玉釵因

名玉燕釵言其吉祥也又起招仙閣於甘泉宮西唐宋之間詩

起草儀仙閣 **昇元閣** 在應天府西南一名尾館梁時建高二

百四十丈秋仁傑詩雲散便宜千里望日斜常占半城陰 **石渠**

閣 三輔黃圖石渠閣蕭何造下確為渠以導水若今御溝曰

以名閣藏八關時所得秦圖籍至成帝又於此藏秘書 **擢秀閣**

在潛山縣址宋陳瓘嘗讀書于此後擢第黃庭堅因以名其閣

自書其扁 **四香閣** 天寶遺事唐楊國忠用沉水為閣檀香為

欄檻以麝香乳香為泥飾於閣壁謂之四香閣 **三瑞閣** 在嘉

定州邛縣西宋寶元間建有蓮木芝三瑞故也嘉祐間又有並

帝蓮九穗禾雙犢牛三瑞因名 **德壽閣** 宋樞密吳居厚被徽

宗遇為建閣於私第以藏賜書又親書發賢之閣四字以寵之

寶文閣 宋都汴時有天章龍圖寶文顯謨徽猷敷文諸閣皆

置以藏諸帝御書者 **絲綸閣** 中書職掌綸誥因謂絲綸閣 **折**

桂閣 在藥亭縣尉廳宋右文殿脩換李夔為尉時生子綱于

此後網為相因呼為相公閣 **回閣** 重閣也黃帝時白鳳巢于阿閣 **鳳閣** 唐王徽曾祖王擇長昆弟皆擢進士第至鳳閣舍人者三號鳳閣王氏 劉邠拜中書舍人請復古制建紫微閣於西省 **麒麟閣** 蕭何所造宣帝圖功臣霍光張安世等十二人於上 **凌烟閣** 唐太宗圖功臣二十四人於凌烟閣 德宗嘗登凌烟閣視左壁頽剥題文漫缺行纜數字命錄以問宰相無能知者召將又至答曰此聖曆中侍臣圖贊帝前口以誦補不失一字 **天祿閣** 劉向校書天祿閣夜暗獨坐誦書有老人黃衣植青藜杖叩關而進吹杖端烟燃與向說開關以前向因受五行洪範之文至曙而去曰我太乙之精天帝聞卯金之子有

博學者下而觀焉乃出竹牒天文地理之書悉以授之 揚雄校書天祿閣上使者收雄雄從閣上自投幾死 **快閣** 山谷詩瘦兒了却公家事快閣東西倚晚晴水落千山天遠大澄江一道月分明 **暖閣** 裴矩諷隋場列繒樓暖閣 亭停也道路所舍人所停集也 **臺** 持也言築土堅高自能持也今土高曰臺有水曰榭書註仲夏可以居高明可以處臺榭月令九層之臺起於累土 **捉月亭** 亭在采石山世傳李白過采石江酒狂水中捉月後人因以名亭 **留侯亭** 亭在潤州金山之絕頂平樂府仙宮嶺有翔鳳亭宋鄒浩建以為避暑之所 **干越亭** 亭在餘干縣羊

角山前瞰琵琶洲唐李德裕建**鵠亭**亭在肇慶府城南按

搜神記漢九江何敞為交州刺史行部至高要宿于此亭夜有

女子守曰妾本廣信蘇氏女名娥嫁為同縣施氏妻夫死遺有

雜繒偕如蘭之旁縣日暮宿于此亭俱為亭長龍壽刺死合埋

樓下敞乃掘尸捕壽壽具伏罪初發尸時有雙鵠奔其亭故名

蕪葦亭漢光武至薊會王子接起兵薊中以應王郎城內擾

亂光武促駕而出不敢入城邑舍食道傍至蕪葦亭時天寒烈

馮異上豆粥**芙蓉亭**亭在永州府龍興寺中多木芙蓉故名

柳宗元有詩**白雲亭**亭在湖州府安吉縣西方山之麓宋乾

道間縣令安鼎晏遊此山後因往上方寺循行而南經此與昔

所夢無異遂建亭名真賞蘇東坡詩云自昔懷清賞神遊香窟

間如今不是夢真賞是廬山**亦松亭**亭在岳州府華容縣南

相傳漢赤松子遊此後人為作亭**異妙亭**蘇軾記熙寧四年

高郵孫莘老守其興之明年住墨妙亭于府第之北道遙堂之

東取境內自漢以來古文遺刻以實之**饋瓜亭**河南府城南

下臨伊水有饋瓜亭宋呂蒙正微時讀書龍門見賣瓜者意欲

得之無錢其人偶遺一故于地蒙正取食之後作相建亭于此

以饋瓜名示不忘貧賤也**解佩亭**亭在安陸州城北漢江邊

即鄭交甫遇仙女解佩處又漳州龍溪縣東有留佩亭宋通判

鄭煥代去郡人攀留煥留佩為別後人即地建亭扁今名**人傷**

亭 亭在河南府城南晉以賈充出鎮長安百僭錢送于此自

且及暮方畢因以名亭**思德亭** 亭在樹州城南華光寺唐杜

甫墓表陽宋郡守劉清之登華光山望之慨然有感遂等亭扁

曰思杜**愛謝亭** 晏殊類要謝靈運會稽人其家世不宜子息

乃寄養于饒唐杜師明舍師明先夜夢有賢人相訪及曉乃靈

運至後因以名亭**榮榮亭** 道州治後有榮榮亭宋時建取

杜甫春陵行榮榮元道州之意又有欣欣亭取白居易道州民

歌老者幼者何欣欣之意有肅肅亭取杜甫餞裴道州肅肅秩

初筵之意有振振亭取柳子文廟碑振振薛公之意**勞勞亭**

應天府治西南有勞勞亭吳時建李白詩天下傷心處勞勞送

客亭春風知別苦不遣柳條青又有休休亭見致仕**盧亭**

九江府城南有登翠亭以對廬山九疊故名宋岳飛建**嶺亭**

崖州城南有望閣亭唐李德裕貶崖州司戶時建詩去獨上江

亭望帝京鳥飛猶用半年程青山只恐人歸去百匝千迴重繞

城**冷泉亭** 在杭州飛來峰下唐刺史元真建白居易記宋梅

詢詩古竇鳴幽泉蒼崖結虛宇六月期客遊披襟苦徂暑開牕

弄清淺吹鬢疑風雨不見白樂天煙蘿為誰語**清穎亭** 穎州

西湖上有清穎亭宋晏殊建蘇軾嘗與弟轍別于此有別淚滴

清穎之句**過溪亭** 杭州風篁嶺有過溪亭宋僧辨才退居龍

井不復出八東坡訪之辨才送至嶺上左右驚曰遠公復過虎

溪矣因作亭名過溪 **臨臯亭** 黃州城南有臨臯亭宋元豐三

年蘇軾謫黃州寓居臨臯亭詩云臨臯亭中一危坐三越清明

新改火後秦檜父官于黃生檜于亭中改名臨臯館 **連理亭**

橫州江南岸有連理亭梁世基舊宅有連理荔枝一株宋神宗

御賜詩橫浦江南岸梁家間世賢一株連理木五月荔枝天 **富**

覽亭 亭在池州府銅陵縣治後宋縣令張孝章建詩云碧尾

朱甍接翠崖周迴無地着纖埃山後雲腳斷邊出水向天根盡

慶來 **石樽亭** 在湖州峴山有石樽可貯斗酒唐別駕李適之嘗

飲于此後顏真卿及門生弟姪多携壺觴來遊作石樽宴集聯

句元至元建亭其上 **車蓋亭** 亭在德安府西北取魏文帝西

北有浮雲亭亭若車蓋之句 **景疏亭** 新喻縣西十里有景疏

亭宋歐陽國華致仕歸景慕二疏而作此亭學士徐君平記 **羅**

池亭 亭在柳州城至宋郡守朱乾刻柳宗元像于中 **三友亭**

亭在四川南充縣宋游炳題明月清風為道友古典今文為義

友孤雲野鶴為自在友惟石流水為娛樂友山果橡栗為相保

友是五友者無須更不在此間也 **國香亭** 新喻縣學西有兩

者亭宋朱熹字長沙道經于此與謝諤會時人作亭表之 **山愛**

亭 亭在平樂府治西北宋郡守梅摯建因摯有十愛詩故以

名亭其詩云我愛昭州月清宵八綺樓涼生荔枝浦冷浸桂江

秋朱戶千家啓浮雲萬里收誰誇魏公子飛上鄴門遊又有愛

寺愛角愛水愛土愛觀愛路愛樂愛酒愛果共為十詩 **化按亭**
化按亭在臨江府東北清江鎮晉陶侃漁于雷澤得一織按挂
壁間一日雷電按遂化龍去後人因作亭于陶母墓側 **相石亭**
吉安府永豐縣南有相石亭宋文天祥兵敗空坑過此山時顧
崖石祝曰天若柝宋願以崖石墮塞路言訖石果墮元兵不得
進後人因名亭曰相石 **天繪亭** 夷堅志昭州瘴毒地而山水
頗清婉郡圃有亭曰天繪郡守李正以與金年號同欲更之有
范姓者為易名清暉後李視積壤中有片石載丘濬所作記其
略云予擇勝得此亭名曰天繪取其景物自然也後某年某月
日當有俗子易名清暉者可為一笑考其命名之月日果不差

萬象亭

福州府舊治有萬象亭宋葉夢得建宣真茶詩云元

戒小試經綸手萬象都歸指顧中

勸亭 亭在寧國府東南

宋治平初縣令周景賢建作文勸民其餘有六行孝弟務農祭

尚儒學興廉遜崇信行近醫藥

杯亭 亭在廣信府城南南

臺之左宋趙汝愚為郡未踰年故成惠洽郡人于祥符寺傍建

相設像為之祝壽汝愚因觴客于中命撤其像戲名曰一杯亭

取且盡生前一杯酒之義

過松亭 亭在岳州府城南相傳呂

仙過岳陽曰憇城南古松陰有人自木杪而下洞窟贈之詩惟有

城南老樹精分明知道神仙過因名亭曰過松 **飛松亭** 世傳

呂洞賓詣京師應舉遇鍾離翁于岳陽授以仙訣遂不復之京

師今岳陽飛吟亭是其相遇處也
壽樟亭 南康府建昌縣治南有壽樟亭宋項安世在記初邑人李左司公懋仕于朝高宗問樟公安否懋奏以枝葉婆娑四時常青何主上萬幾之暇眷乎遐方一樟或必閭閻纖悉轉而上聞抑念世家仁及此木也紹定間縣令陳文孫刻圖于右
顏樂亭 在曲阜縣顏子庙前舊有廢井宋膠西太守孔周翰濬井及在亭扁曰顏樂司馬光有銘蘇軾有記程顥有詩
借景亭 眉州青神縣治後舊有亭下瞰史家園園多佳景宋黃庭堅嘗遊此扁曰借景因留詩云當官借景未傷民恰似鑿池取明月

慕許臺

戴延之西征記許昌城本許由所居城東北七里有

許由臺高六丈廣三十步邑人慕許由讓德而立
曹將軍臺 在真定府棗強縣北相傳姜太公未逢時嘗賣蓍于此
朝漢臺 沈懷遠南越志熙安縣東南有崗高數十丈岡西南為羊腸道說者云尉佗登此望漢而朝宗曰望漢臺今廣州府城北有越王臺即此望漢臺也宋楊廷秀詩榕樹梢頭訪古臺下看碧海一瓊杯越王歌舞春風地今日春風獨自來
釣臺 在嚴州城東西二臺各高數百丈東漢嚴子陵垂釣處宋范仲淹詩漢包六合網英豪一箇真鴻惜羽毛世相功臣三十六雲臺爭似釣臺高
撫琴臺 在瀘州城北昔尹吉甫子伯奇被後母譖于此臺撫琴在履霜操以自悲宓子賤琴臺在兗州單父治北漢司

馬相如琴臺在城都府華陽縣市橋西

成縣西一十里上有子游祠金石臺在江西撫州城西有名

峰五第一峰獨高餘五峰差小名金石臺與第四峰聯屬後石

洲水流其中故時有金石臺分丞相出之語宋晏殊王安石相

紐拜相人以為應書樓臺在封丘縣界宋康王欲棄其舍人

韓憑之妻乃等臺望之徐帳臺在荆川西南漢馬融教授之

所疑廢臺杜陽編唐大中日本國王子來朝云本國之東

三萬里有集真島島上有凝露臺臺上有手譚池池中有玉棊

子不由制度自然黑白分明道臺臺王褒雲陽記鈎戈夫人

後上至甘泉而卒尸香聞十餘里葬雲陽武帝思之起通臺臺

于甘泉宮有一青雀集臺上時常往來至宣帝時乃不至

臺岳州君山有軒轅臺一名鑄鼎臺黃帝鑄鼎荆山之下鼎

成騎龍上昇唐胡曾詩五月扁舟過洞庭魚龍吹浪水雲腥軒

轅黃帝今何在回首巴山麓夜青淮嶽臺在兖州鉅野縣東

南即西狩獲麟之所後人于此築臺判虎臺在鳳陽定遠縣

治後相傳宋包拯為縣令虎傷人捕虎繫于臺前判之

在兖州鄒治東南昔子思曝書于此銅雀臺在臨漳縣治西

魏太祖建又有金虎冰井臺三臺相去各六十步其上複道樓

閣相通中央懸鑄大銅雀高一丈五尺置之樓頂臨終遺令施

總帳于上朝晡時使宮中歌吹帳中望吾西陵西陵操葬處也

金牛臺

在武進縣西劉宋元嘉末劉季之敗華欽于此與蕭

順之共登此臺見枯骼橫道曰文王以來幾何年矣當復有掩

之者乎

鹿女臺 在秦州城內昔有王仙翁居山中見馴鹿產

女於草莽中挈養於蒼鹿來乳之後十六載仙翁等臺居之

戲馬臺

在南陽三鴉路中大山側相傳漢光武北趨河朔至此

失路得鴉引于馬前因飼之于此故名

州城東南項羽嘗戲馬於此劉宋武帝在彭城九日曾登此臺

卧牛臺

卧牛臺在襄陽府棗陽縣漢光武嘗騎青牛于此

三休臺

在荊州監利縣北楚靈王以築翟王使使之楚王欲

誇之享于章華之臺三休乃至其上故又名三休

呼鷹臺 在

襄陽城址漢劉表好鷹鳴嘗登此臺歌野鷹來曲宋蘇軾詩莫

上呼鷹臺平生笑劉表

鄉里

釋名鄉向也衆所向也風俗通里止也五十家共居止

也周禮大司徒令五家為比使之相保五比為閭使

之相愛五閭為族使之相愛五族為黨使之相救五黨為州使

之相賙五州為鄰使之相賔 一命齒于鄉里 里有殯不巷

歌禮鄉人飲酒杖者出斯出矣語鄉黨莫如齒孟死徒無出鄉

鄉田同井出入相友守望相助疾病相扶持全五十養於鄉六

十杖於鄉禮維桑與梓必恭敬止詩適異鄉者見似人而喜

孔子於鄉黨恂恂如也似不能言者語孔子去魯曰遲遲吾行

也去父母國之道也孟平木隱而西河姜李陵降而隴西慚

諱其里社 燕人生於燕長於楚及老而還本國過晉國同行

者誑之指城曰此燕國之城其人愀然變容指社曰此若里之

社乃喟然而歎指舍曰此若先人之廬乃涓然而泣指壠曰此

若先人之冢哭不自禁同行者啞然大笑曰子昔紹若此晉國

耳其人大慚及至燕悲心更微列下車故鄉常擬謂老子曰

過故鄉而下車子知之乎老子曰非謂其不忘故耶擬曰嘻是

也說**八里門** 萬石君徙居陵里慶及諸子八里門趨至家

張湛為馮翊告歸平陵望里門而步主簿曰明府位尊不宜自

輕湛曰父母之國所宜盡禮何輕之有 魯卿為太守嘗入

壺關望縣門輒歎曰公門當下况父母邦乎**君子鄉** 王烈以

義行稱鄉里有爭田者將質之於烈或至塗而反有望廬而反

有盜者不辭刑罰勿使王彥方知之號所居為君子鄉**賊不入**

鄉 魏任璇字子旗樂安博昌人漢末黃巾起到博昌聞璇姓

名曰風聞任子旗天下賢人今作賊那可入其鄉耶**穢里** 齊

劉繪為南康相都人有姓賴所居名穢里繪朝之曰君子何穢

而居穢里答曰未審孔子有何闕而居闕里**昭阿里** 唐張嘉

貞為相弟嘉祐為金吾將軍每上朝軒蓋驕導益閭時號所居

坊曰鳴珂里**孝倫里** 趙清獻公之里表曰故孝子太師趙清

獻居其里曰孝悌里**用所知** 許允為吏部郎多用其鄉里魏

明帝遣虎賁收之既至帝數問之允對曰臣之鄉人臣所知也

乞骸骨 貢禹上書曰臣禹犬馬之齒八十一自痛去家三

千里誠恐一朝躋仕不能自還骸骨棄捐孤魂不歸不勝私願

乞骸骨及身生歸鄉里無所恨 **陸機** 荀彧字文若董卓

北亂棄官歸謂父老曰潁川為兵衝宜亟去之鄉人懷土猶豫

會冀州牧同郡韓馥遣騎迎之莫有隨者或獨將宗族至冀州

鄉思轉深 陸機在洛忽思東頭竹篠之飲語劉寶曰鄉思轉

深矣 **秋思** 張翰字季鷹吳郡人齊王罔辟為大司馬

東西掾罔時執權翰謂同郡顧榮語欲去意榮執其手曰吾亦

與子採南山蕨飲三江水耳翰因見秋風起乃思吳中菰菜蓴

羹鱸魚膾曰人生貴得適志何能為官數千里以要名爵乎遂

命駕歸俄而罔敗人皆謂之見幾 **三組** 漢武帝以重書

勅責樓船將軍楊僕曰將軍請乘傳行塞因用歸家懷銀黃垂

三組夸鄉里銀黃金印也主爵樓船梁侯故云三組 **冠蓋**

襄陽郡峴山南至宜城百里餘其間雕墻峻宇閭里填列漢宣

帝未其間有卿士及刺史二千石數十人同日大會荊州刺史

行部見之勅縣各其里為冠蓋里 **拔節還鄉** 後魏董徵以儒

學累遷安州刺史因述職過家置酒高會乃云腰龜返國昔人

稱榮杖節還鄉云胡不樂誠子弟曰此之富貴匪自天降乃勤

學所致耳時人榮之 **守郡不向** 包拯合肥人出守本郡不肯

少屈法以阿鄉曲之好故流俗稍稍謗議公乃為詩以見意其
間一聯云直幹終為棟真剛不作鉤其守正不回如此善溪隱

賑其鄉

中宗時僕射魏元忠還宋州拜掃上幸白馬寺以送

之制曰衣錦晝遊在乎茲日散金敷惠諒為斯辰元忠至鄉竟
無所賑施議者短之**封齊反樂**檀弓曰太公封于營丘比及

五世皆反矣子周君子曰樂之其所自生禮不忘其本古人有

言曰狐死正丘首仁也

禮源南音

鍾儀為晉所繫晉侯與之

琴操南音晉侯曰樂操土風不忘本遂釋之左

越吟

莊舄仕

楚之王曰舄越之鄙人今入楚富貴亦思越否使人往聽之猶

越吟其得鄉心

魯甫大散財貨甚得鄉里欣心又晉何琦尚

節義豐約與鄉鄰共之

南朝陸襄

少有大志與鄉

里落落不合越州刺史趙政問之襄曰世降道衰人多趨利是

以索居政器之

百陽鄉

劉子玄封居巢縣子鄉人以其兄弟

六人俱有名號鄉曰高陽里曰居巢

劉仁軌

進爵為

公子及兄子受上柱國者三人州黨榮之號所居為樂城鄉

孝子鄉

北史華秋事母以孝母喪負土成墳築廬墓側詔表

其門閭後賊起咸相戒曰勿犯孝子鄉

揚名鄉

五代鄧祐臨

江人擢童子科命吉擢三禮科改所居為揚名鄉

泉德里

北史紐因字孝故父母亡廬于墓負土成墳墳前生麻一株其

大合拱冬夏常青周武帝表其閭擢授甘棠令子士雄亦至孝

父喪廬墓達槐枯死眼終還家槐復榮茂周文帝下詔號所居
 為累德里**曹陽里**唐賀德仁兄弟八人居甘諤里太守王
 伯山改為高陽里**德公鄉**唐咸通中建昌令邵師裕為政以
 德邑人感之以德故名其鄉隣境之人慕之多來歸附又以上
 隣名鄉**鄭公鄉**東漢鄭玄字康成北海人學徒數千人國相
 孔融深敬玄令高密縣為玄特立一鄉曰鄭公鄉開廣其門閭
 令容高車號曰通德門**光德里**唐博陵崔郊兄弟六人自始
 仕至貴達同居光德里一宅**調元鄉**宋李昉字明遠所居鄉
 曰調元鄉素鉤里**細鄰娶婦**昔顏叔子嘗獨處子室鄰之娶
 婦遇夜暴風雨至室壞婦人趨而至顏叔子納之使秉燭放手

旦而燭盡束薪而繼之**挑鄰美女**晉書謝鯤字幼輿見鄰女
 高氏貌美挑之女投梭折其兩齒時人語曰任達不已幼輿折
 齒鯤長笑曰猶不廢我嘯歌**義里**會稽典錄陳囂與民紀
 伯為鄰伯夜拔藩竊囂地自益囂見之伺伯去後密拔其藩一
 丈以地益伯伯覺慙懼既還所侵又却一丈太守周公高囂德
 義刻石旌其閭號曰義里**鄰人送酒**晉陶侃家貧有友人見
 過侃無以致誠其鄰人謂侃曰子門有長者軒車何不迎之論
 當世事侃曰貧未能備禮耳鄰人密于墻頭送濁醪隻鷄遂成
 終日之歡**同里**唐于鵠鄰居詩僻巷鄰家以茅簷喜並
 居蒸梨常共甕澆雞亦同渠傳屐朝尋藥分燈夜讀書雖然在

城市還得似樵漁宋梅堯臣贈鄰居詩壁隙透燈

光籬根分井曰徐鎧喜李以保下鄰詩井泉分地脉砧杵共秋

聲鄰居年地石勒與李陽鄰居爭漚麻池日相歐擊及貴

乃召陽與酣詭引陽臂笑曰孤曩且厭卿老拳卿亦飽孤毒手

廣雅聽談宋張鏡與顏延之鄰居顏談義飲酒叫呼不絕而

鏡靜默後鏡與客談延之從籬邊取胡床坐聽醉義清玄延之

曰彼有人焉由是不復酣叫

第宅

宅擇也言擇吉處而營之也釋室有東西廂曰廟無

東西廂有室曰寢無室曰榭爾雅築室百堵西南其戶

爰居爰處風雨攸除鳥鼠攸去斯如歧斯翼如矢斯棘如鳥斯

革如鞞斯飛上如彼築室于道謀是用不潰于成詩若作室家

既勤垣墉惟其塗墍若作梓材既勤樸斲惟其塗丹雘梓君

子將營宮室宗廟為先廡庫為次居室為後禮儒有一畝之宮

環堵之室禮華門圭竇蓬戶甕牖禮國宅無征注城中宅無稅

也禮子罕曰吾儕小人皆有闔廬以避燥濕寒暑國子曰季孫

之憂在蕭牆之內注蕭言蕭也牆謂屏也君臣相見之禮至屏

而加蕭恭焉謂之蕭牆大厦成而燕雀相賀雅高祖詔列侯

食邑者皆賜大第室更二千石受小第室註有甲乙次第故曰

第漢書爵雖列侯食邑不滿萬戶不得作第其舍在里中皆不稱

第初學高明之居鬼瞰其室揚解霜斤冰搯玉沙瑩礎廬尉繚

第初學高明之居鬼瞰其室揚解霜斤冰搯玉沙瑩礎廬尉繚

子曰天子宅千畝諸侯宅百畝大夫以下里舍九畝

孔子絲竹 魯共王好治宮室壞孔子舊宅以廣其居王又陞

孔子堂聞絲竹金石之音乃不壞宅 **美哉輪奐** 晉獻文子成

室晉大夫發也為張老曰美哉輪為美哉與焉歌於斯哭於斯

聚國族於斯文子曰武也得歌於斯哭於斯聚國族於斯是全

要領以從先大夫於九京也君子謂之善頌善稱禮 **視如復舍**

平恩許伯八第益寬饒賀之酒酣仰屋而歎曰美哉富貴無常

忽則易人此如傳舍所閱多矣惟謹慎為能久 **遜宅與兄** 裴

楷營新宅基宇甚麗當移住兄心甚願之而口不言楷知其意

便使兄住別傳 **題門賣宅** 齊庾果之接魏使使問百姓那得

家家題門帖賣宅答曰朝廷欲掃蕩京洛尅復神州所以家家

賣宅耳 **兄弟爭錢** 宋蔡興宗父廓起二宅以東宅與兄軌軌

送錢五十萬禪宅直與宗白母曰一家由来豐儉必共今日宅

直不宜受也 **綠野堂** 裴度出為山南東道節度使時閣孺擅

威度不復有經濟意乃治第東都集賢里作別墅具煥館涼臺

號綠野堂激波其下度野服閑散與白居易劉禹錫為文章把

酒窮晝夜相歡不問人間事帝知度年雖及神明不衰每大臣

自洛來必問度安否文宗復詔節度河東曰為朕目護北門可

也未幾度 **白居易** 白居易被遇憲宗時事無不言為當

時所忌乃故意文酒無立功名意於京都所居履道里疏沼種

類苑卷之六
二十七

樹構石樓香山鑿八節灘自號醉吟先生**宅氣索然**浮屠承
與張說市宅戒無穿東北隅他日怪宅氣索然視隅有二坎丈
餘驚曰君富貴一世而已諸子將不終說將塞之私師曰容土
無氣與地脉不連臂身瘡痛補他肉無益也**重國**李林
甫為相自見結怨者多憂刺客竊發所居重關複壁絡繹石一
父并徙家人莫知也**買宅得金**魏郡張本富賣宅與程應七
舉家疾病賣與何文文先獨持大刀暮入北堂梁上一更中有
一人長丈餘高冠赤幘呼曰細腰細腰應諾問何以有人氣答
無便去文曰呼細腰問向赤衣冠是誰答曰金也在西壁下問
君是誰答云我杵也今在竈下文掘得金三百斤燒去杵由此

大富宅邊滑室**唐僧**弘師云長安永寧坊東南是
金盞地安邑里西是玉杯地後永寧為玉鈔宅安邑為馬燧宅
後入官王宅賜家弘及史屬誠善所謂金盞破而不成馬燧宅
為鳳城園所謂玉杯破而不復完也禮記**厚遺**徐鉉初
自南唐入京市宅以居歲餘見故宅主貧甚鉉召之曰得非售
宅虧價而致是也余近撰碑額測筆二百千可償爾美其主堅
辭不獲亟命左右輩以付之**興寧**問故大師王公
即洛之道德坊邊第甚侈中堂起屋三層最上曰朝元閣時司
馬君實亦不始於私第穿地深丈餘作壞室二公各嘗登處其
間邵雍克夫見富鄰二公問洛中有何新事克夫曰近有一巢

卷之七
七

居一穴慶者遂以二公對富也世美可懼 智棄子為室

幾士強為伯曰室幾矣夫對曰幾則幾矣臣意亦有懼也高

山峻原不生草木土木勝人臣懼其不安人也室成三年而智

氏巨為人起室 却超每聞彼高尚隱退者輒為辦百萬資

并為造立居室在剡為戴公起宅甚精戴始往居與所親書曰

近至剡如入官舍宅後魏王椿於鄉造宅廳事極高

杜椿往為本郡人呼為王太原時人德云此乃太原王宅豈王

太原宅未幾爾朱榮居椿宅幾對太原王為示唐安史之亂

法慶陳池內臣戎帥競始亭館第宅力窮乃止時號太奴雜書

果

唐馬周為御史時遣人以圖購佳宅眾以與書生

素無資貲竊笑他日自有佳宅直二百萬周以聞詔有司給直

并賜奴婢什物人乃悟公買宅段文昌負才傲俗落拓荆

楚間江陵街側有大宅門枕流渠文昌醉於渠上脫衾濯足自

言我作江陵節度必買此宅聞者皆笑其後果鎮荆南遂買此

宅集燭一覽郭從義鎮河陽於路中造大第皆以香柏為之

文梓為器花石甃池引水築山礮礮厠庫亭閣無不備具第成

約費白金五千錠次年被召還都暮抵其第秉燭周覽時朝會

有期侵星而出行至東都而卒家人不能居君趙韓

王治茅麻搗鐵一千二百餘貫其他可知蓋屋皆以板為笄上

以方磚甃之然後布瓦至今完壯丞相陳秀公升

治第于潤州極為閎壯綿亘數百步宅成公已疾甚唯肩輿一
登西樓而已人謂之三不得居不得費不得脩不得斲

樞 原憲居環堵之室蓬戶不完桑以為樞斲以為牖上漏下

濕坐而絃歌在 **子真** 蕭何買田宅必居窮僻處不治垣

舍曰令後世賢師吾儉不賢毋為務家所奪 **區相** 河間

王孝恭嘗謂人曰所居頗壯麗非吾心也當別營一區令粗足

充事而已吾歿後子也才易以守不才不為他人所利 **何以**

為 武帝為霍去病治第令視之對曰匈奴未滅何以家為 **蓬**

曹病 後漢張仲蔚蓬蒿荆宅唯開一行徑 **區相** 兵

隱之為廣州刺史盧循寇南海隱之為所得久方得反數畝小

宅籬垣側陋內外茅屋六間不容妻子尋穰度支尚書第舍以

居 晉羅含為桓温別駕以解舍誼樓於城西小洲立茅舍以

居織草為席布衣蔬食晏然也 **切責** 後漢長孫道生位

司空第宅卑陋出鎮後子頗更脩繕起堂廡道生還曰今強寇

尚在遊魂漠北吾豈可安坐萃美也乃切責子弟毀宅 **蝸牛廬**

魏焦先字孝然結草廬於河間踰蝸牛廬呻吟其中後野火燒

之乃露寢雪中袒卧人視之並如故後至百餘歲卒 **小船** 岸居

齊張融為中書郎給假東出武帝問住何處答曰臣陸處無舟

舟居無水上後問其姓兄緒緒曰融近東出未有居止權作小
船岸上住帝大笑 **如字** 梁徐勉戒子書曰吾清明門宅

西邊既施宣武等不復方幅意謂亦逆旅舍爾何事須華常恠
時人謂是我宅古往今來豪富繼踵宛其死矣定是誰室不益

私宅

梁呂僧珍世居廣陵後為本州刺史僧珍舊宅在市北

前有督郵解或勸徙解以益宅僧珍怒曰豈可徙官解以益吾

私宅乎

不立田園

唐張嘉貞雖貴不立田園常曰吾相國矣

未死豈有饑寒憂若以譴去雖富田產猶不能保也近世士大

夫務廣田宅為不肖子酒食費我無是也**客益而後** 崔郾室

處卑陋無步廡至霖淖則客益而後以就列位**不管美字** 唐

李義琰為相宅無正寢第義琰市堂材送之義琰曰以吾為國

相且自愧尚營美字是速吾禍卒不許木之腐乃棄之**久不置**

屋

曹彬所居之宅僅庇風雨敗落踈曠不堪其憂而彬處之

恬然自若堂屋敝壞子弟請加修葺公曰時方大冬墻壁尾石

之間百虫所蟄不可傷其生**歸田** 杜祁公村不殖

貨產退寓南都凡十年第宅卑陋居之裕如出入從者纔十許

人為帽皂履絳袍革帶親故或言宜為居士服公曰老而謝事

尚可竊高士名節耶**履絳袍**

李文靖公沈為相治居第於

封丘門內廳事前僅容旋馬或言其大隘公笑曰居第當傳子

孫此為宰相廳事誠隘為大祝奉禮廳事已寬矣**不增故院**

李愬昆弟勲貴務室廬愬處父時故院無所增廣 後周王羅

位開府大將軍舊宅不改衙門**不肯治第** 范文正在杭州子

弟以公有退志乘間請治茅洛陽樹園圃以為逸老之地公曰
人苟有道義之樂形骸可外况居室哉吾今年踰六十生日無
幾乃謀樹第治園顧何待而居乎吾之所患在位高而艱退不
患退而無居也且西都士大夫園林相望為主人者莫得常遊
而誰獨障吾遊者豈必有諸已而後為樂耶俸賜之餘宜以調
宗族若曹遵吾言無以為慮願宗祖宅桓玄欲以謝安宅為
營其孫謝琨曰召伯之人猶惠及甘棠文靖之德更不保五畝
之宅耶玄聞慙而止先人敝廬龍門王通教授於河汾之間
累徵不起楊素勸之仕通曰有先人之敝廬足以庇風雨薄田
足以具糈粥讀書談道足以自樂願明公守正以治天下使時

和歲豐通也受賜多矣不願仕也

權臣貪念

楊損居新昌里

與路巖第接巖方為相欲易其廐以廣第損曰今尺寸土皆先
人舊貲非吾所有安可以奉權臣耶窮達命也卒不與

與

李建子訥居與宰相楊收接欲市完舍以廣第訥曰先

人舊廬為權貴優美地耶不敢改作

韓滉性節儉堂先無技

燕弟泗增補之濕撤去曰先君容為吾等奉之常恐失墜安敢

改作以傷儉德門谷長戟

晉王濬恢廓有大志嘗起宅開門

前路廣數十步或問之濬曰吾欲容長戟插旗衆笑之濬曰陳
勝有言燕雀安知鴻鵠之志後夢三刃遷益州刺史假三淮第

唐李師道上私錢六百萬為魏徵孫贖故弟白居易言徵任宰

相太宗用殿材成其正寢後嗣不能守陛下猶宜以賢者子孫
贖而賜之師道人臣不宜掠羨帝從之 宋呂端諸子多不同
處舊第以質於人真宗聞之出內庫錢贖還之令其聚居端長
子蕃言負人息錢甚多帝別賜內庫金帛償之 **標榜賣官** 此
齊皇甫亮所居宇穹下標榜賣之買者問其故亮曰為宅中水
渰不洩雨即水流牀下由此宅終不售亮淳實不矯飾如此 **治**
第華借 唐許敬宗營第舍華借至造連樓使諸妓走馬其上
危竈 危食厨也 說文 竈創也創造食物也 釋名 君子遠危厨也
王竈君禪字子郭衣黃衣披髮從竈中出知其名呼
之可得除凶惡 竈馬狀如促織穴於竈側俗謂竈有馬足食

之此 雜 竈之神每晦日輒上天責人罪狀大者奪紀紀者三
百日也小者奪算 神異記 今之竈門安樂慶
食中有異 寧人上爰 魏統 之文公召寧人而謂之寧人曰臣有
死罪三援燭矜刀利獨干將肉斷而髮不絕臣之罪一也援錐
貫鬪而不見髮者之罪二也奉爰鑊及肉盡赤紅爰熟而髮不
焦臣之罪三也堂下得微有發臣者皇方召其黨而謂之果然
乃誅之 **食中有蠅** 梁昭明太子食中頻得蠅虫之類密置拌
邊恐厨人獲罪不令人見 **啖得食者** 顧榮字彥光輟已爰啖
行炙者曰豈有終日執之而不知其味者耶 **監厨人** 隋李
圓通少孤賤給事文帝家帝為隋公每賓至帝令圓通監厨圓

通性嚴整婢僕故憚惟世子乳母特寵輕之每有干請不許輒持去圓通大怒叱厨人撾之數十帝喜之以為堪大任後位太府卿漢人吹王文正局量寬厚未嘗負其怒飲食有不精潔者但不食而已一日子弟懇于公曰庖肉為饗人所私食肉不飽乞治之公曰汝輩人料肉幾何曰一斤今但得半斤食其半為饗人所啖公曰盡一斤可得飽乎自盡一斤固當飽曰此後人料一斤半可也其不廢人過皆類此漢書後漢陰識光烈皇后前母兄也其先出自管仲宣帝時陰子方者嘗臘日晨焚窻神形見于方拜受應家有黃羊因以祀之曰後暴富子方嘗言我子孫必將張大至識三世遂繁昌魏大龜

卞伯玉作東陽郡竈正熾火有鷄透從口入良久乃於突而出毛羽不焦鳴啄如故玉尋病頰

堂 釋名堂謂堂堂高顯貌一云堂堂也又明也

唐 宋趙以元豐中為溫梓其父清獻公拈致仕家居以迎以乾養因取老萊子戲綵之義名堂清獻詩云我慈堂中樂可知優游踰月意忘歸老萊不及吾兒少且看朱衣勝綵衣又廖剛字用中累世以率髮奉養曾大母年九十三曾大父年八十八公名其堂曰世綵諫議陳公等播之聲詩名世綵集唐唐李林甫有堂如偃月號偃月堂每欲擯斥大臣必居此

堂思中傷之水三堂在南康府治後愛蓮堂之北宋郡人
 劉煥字毅之故居蘇軾嘗曰毅之父于廉察不撓水清而玉剛
 鄉人因以名堂朱元晦張文潛俱為作記按煥子名恕字道原
有美堂 宋嘉祐二年梅摯以龍圖閣直學士尚書吏部郎中
 出守于杭仁宗守其行也賜詩以寵之其首章云地有湖山美
 東南第一州因取有美二字以名堂歐陽脩作記桂籍堂 宋
 太宗與國中進士中第賜題名于桂籍堂此題名之始唐人題
 名于慈恩寺乃進士自題也

齋

說文齋潔也取其戒潔之義以為室也杜陽編梁武帝
 造佛寺令蕭子雲飛白大書一蕭字于中李約之見之

破產買歸東洛建一小室玩之號蕭齋後世齋之名始此一說
 漢宣帝齋居央事此齋名之起也東齋贈墨 輿地志漢王朗
 為會稽太守王肅隨之郡住東齋中夜有女子從地出稱趙王
 女與肅語至曉別贈一丸墨肅方欲往周易因此便覺才思開
悟長齋 王儉僧虔之兄子也作長梁齋制度小過僧虔不
 悅竟不入戶儉即日毀之學齋 宋真德秀越山新居成名
 其齋曰學易春帖云坐看吳越兩山色默契羲文千古心有
齋 宋尹焞一室名六有齋取橫渠言有教動有法晝有為宵
 有得瞬有養息有存之意一室名三畏堂

廁

國廁也又圓也說觀室者周於寢廟又適其偃焉注偃
 謂屏廁也屏廁則以偃漉莊呂靜曰械或窬囊器也械
 虎子也窬行清也孟康曰廁行清窬行中受糞者也 俗命如
 廁為屋頭并州人鑿土為室廁在所居之上故也

廁鼠不食

李斯為小吏見廁鼠食不潔近人大數驚入倉觀

倉中鼠食粟不見人之憂歎曰人之賢不肖如鼠矣在所自處

耳乃從荀卿子

廁有野蔬

郅都侍上賈姬如廁有野蔬入廁

中上目都擊之都不往欲自往都伏諫曰一姬死復一姬生

上欲自輕奈太后崇廟何太后聞之賜都金焉

淮南

淮南

王安謂仙伯坐起不恭主者奏安不敬請守廁三年

神仙

廁見

未衣

陶侃嘗如廁見一朱衣赤幘劍履曰以君長者故來報

君後當為公侯至八州都督

廁婢持香

晉劉寔以貧窶及後

位太尉每崇儉素嘗詣石崇家如廁見有紋帳榻褥甚麗兩婢

持香囊寔便退笑謂崇曰誤入卿內崇曰是廁耳寔曰貧士未

嘗得此更如他廁 石崇以奢豪矜物廁上常有十餘婢侍列

皆有容色置甲煎粉沉香汁如廁者皆易新衣容皆羞脫而王

敦脫故着新意無作諸婢相謂曰此客必能作賊 王敦初尚

主如廁見紫箱盛乾棗本以塞鼻王謂是菓食盡婢擊金盤盛

水琉璃盛澡豆因倒著水中而飲之群婢掩口

說世

廁見方相

庾翼鎮州如廁見一物頭如方相兩眼大有光翼擊之八地因

病而憂鹵簿入廁

宋沈慶之在文帝時受引鹵簿入廁中意

惡之占者曰君必大富貴然不在旦夕間鹵簿固是富貴容廁

中所謂後帝也知君富貴不在今主慶之果以孝武世登三事

廁神月遊

侍御史錢義方居常樂第夜如廁忽見蓬頭青衣

數人來逼義方曰汝非郭登曰然余乃廁神每月出巡續錄

淚成堆

寇準知鄧州自少年富貴不點燈九好夜宴劇雖寢

室亦然燭達旦每罷官去後人至官舍見廁溷間燭淚在地往

往成堆如廁遇見

有承郎馬上內逼急詣一空宅徑登溷軒

乃大優穆刁綾空屋也將上馬穆優忽至曰侍郎他日內逼詣

先訪登溷詩

程師孟知洪州作正堂自愛之無日不到作詩

曰每日更忙須一到夜深長是點燈來李元規笑曰此乃登溷

詩也 柳永詞云今宵酒醒何處揚柳岸曉風殘月或以為佳

句東坡笑曰此稍工登溷處耳

園圃

說文園植果圃植菜 貴于立園 易樂彼之園 無

踰我園 遊于北園 折柳樊圃 九月築場圃並

園圃毓草木

場人掌場圃并周禮 淮南子曰臨江之鄉其人汲

水以溉其園紅水不減也 又曰山有猛獸林木為之不斬園

有螫虫藜藿為之不採 樊遲請學為圃子曰吾不如老圃語

抱甕灌園

子貢過漢陰見一丈人鑿隧抱甕汲井取水而灌

園子貢曰有機於此日浸百畦挈水若抽各曰桔槔丈人曰吾

知之恥而不為 **後園** 公儀休相魯按園葵去織婦又嗜魚

不受魚 **不損園** 董仲舒下帷講誦三年不窺於舍園 後漢

法真隱居大澤講論術藝歷年不問園圃 **歸家灌園** 吳祐遷

膠東侯相時濟北戴宏父為縣丞宏年十六從在丞舍祐每行

園常聞諷讀之音甚奇之與為友宏卒成儒宗知名東夏為河

間相因自免歸家不復仕灌園疏以經書教授年九十八卒

陳仲子字子終齊人也楚王聞其賢遣使聘之欲以為相仲子

入告其妻妻曰夫子左琴右書辟纒織屨恬淡無為樂在其中

矣結駟連騎所安不過容膝而懷楚國之憂可乎于是謝使者

遂相逃而為人灌園 **肩輿入園** 晉王獻之高邁不羈嘗經吳

郡聞顧辟彊有名園初不相識乘平肩輿入辟彊方會食客

獻之游歷既畢傍若無人辟彊數之曰傲主人非禮也以貴驕

士非道也失是二者不足齒之僮耳便驅出門獻之傲如也不

以屑意 **翻車灌園** 魏馬鈞巧宦絕世居京師有地為園而無

水以灌乃作車令兒童轉水灌園 又曰傅玄先生作翻車其

功百倍 **灌園收利** 向秀與呂安灌園於北陽收其餘利以供

酒食之費 **種藥後園** 蘇耽嘗除門庭有眾賓來耽告母曰人

招耽去已種藥者後園梅樹下可治百病一葉愈一人賣此藥

過足供養 **鉏園得金** 管寧擊散園中鉏菜見地有片金管揮

鉏與瓦石不異舉捉而擲之人以此為優劣 桓帝時沛國戴

翼鋤園得黃金印 **金谷園** 石崇金谷詩序曰余有別廬在金谷澗中或高或下有清泉茂林衆果竹柏藥草之屬莫不畢備又有水確魚池土窟以為娛目歡心之備矣 **園丁賣菜** 柳元景為尚書令南岸有數十畝菓園守園人賣菜得錢三萬送宅元景曰我立此園種菓以供家中啖耳乃復賣以取錢奪百姓之利耶以錢乞守園者 溫公嘗獨樂園園子呂直性愚公以直名之春時人遊園園子得茶湯錢十千閉園日與主人分之一日來納公公曰此自汝錢可持去再三欲留公怒遂持之顧曰只端朋不愛錢者後十許日公見園中新創一井亭問之乃前不受十千所創也 **不市張園** 張東之有園圃在襄陽曹王

卓為山南東道節度將市取之馬彛諫曰漢陽有中興功人遺業當百世共保奈何使其子孫鬻亭卓謝曰主吏失詞以為君羞微君安得聞此 **盜蔬不問** 齊范元琰家貧以園蔬為業嘗見人盜其蔬元琰遽走欲起其愧恥或有涉溝盜其莖者元琰伐木為橋以度之盜者大慙 何隨家養竹園人盜其筍隨行遇見恐盜者覺怖走竹傷其足擊獲徐步而歸 **道溪園** 在西安府東山曲唐道遥公韋嗣立置張說為之記 **葵山園** 宋崔鷗字德符宣和末除侍御史以學疾致仕治園數畝號葵山園在南陽府郟縣 **流星園** 亳州東天靜宮碑有星突流于園老子因而誕生故名 **羅浮園** 劉慧斐張孝秀隱居東林寺慧斐

于山北構一園名離垢時人稱為離垢先生**東離園**梁何點

世信佛居東離園孔德璋為築室豫章王英命駕造點點從後

門道去園有十忠貞塚點植花塚側每舉酒必酌之按此園在

應天府東離門外忠貞晉卞壺謚**千秋園**在河南靈寶縣今

舊田村是也宋范鎮詩自古挑林漢相園至今有舍號田村蒼

山綠水依然在不獨青編事業存**樂天園**樂天嘗云吾第在

履道坊五畝之宅十畝之園有水一池有竹千竿即此**奉誠園**

唐馬燧之子暢以第中大杏餉實文場文場以進德宗德宗未

嘗見怪問之令中使封暢杏樹暢因進宅為奉誠園**百錢園**

唐主四月憶瓜明崇儼有道樹建常百錢以往須更以不獻

得之緱氏老人圃中帝召老人問焉對曰埋一瓜失之土中得

百錢羊踏菜園有人常食蔬忽食羊夢五臟神曰羊踏破菜

園啓頰

村莊村墅也說文莊者取箴聚之義呼別業為莊

黃葉村宋高宗作詩賜統制劉漢臣勒石潮鳴寺中野水參

差落漲痕疎林欹倒出霜根扁舟一棹向何處家在江南黃葉

村寺在杭州慶春門外高宗南渡駐蹕寺中聞江濤聲以為金

兵追至駭之已而問知其故遂賜寺今名**伏波村**伏波村在

扶風縣漢馬伏波將軍故居**昭君村**王嬙字昭君生於峽州

州有昭君村村中凡生女必灸其面白樂天詩不效往者戒恐
貽來者寃至今村女面燒灼成癍痕

由拳村

餘杭縣有由拳

山傍有由拳村出藤紙搜神記秦始皇東巡望氣者曰五百年

後江東有天子氣始皇令囚徒二十萬人掘汚其地表以惡名

故曰由拳

五城村

五城村在休寧縣古有二大墳昔人有數

之者鐵棺厚二尺棺纜破便雷雨晦冥人懼乃止

落星村

落

星村在鳳翔府郿縣五丈原即長星墜諸葛亮營處

河間府景州西南廣川鎮有董家里一名董學村即仲舒讀書

處朱紹明詩連村禾黍名猶昔故址荒蕪草自春慨想江都為

相日高風下古更誰倫

樓桑村

樓桑村在涿州西南即漢先

主故居東南隅有桑高五丈許如車蓋人異之因號其里曰樓

桑村

買愁村在瓊州府臨高縣南宋胡銓詩北往常

思聞喜縣南來怕八買愁村區區萬里天涯路野草荒烟正斷

媿朱陳村

徐州古豐縣深山中民俗淳質一村惟朱陳兩姓

世為婚姻名朱陳村蘇東坡詩何年顧倩丹青手畫作朱陳嫁

娶圖聞道一村惟兩姓不將門戶買崔盧

西湖村

西湖村在

孝感縣西宋太祖微時因渴索酒於村媪家媪持酒進言推禁

甚嚴此私釀幸密之與金不受後太祖登極特寬西湖村酒禁

午橋村

唐裴晉公午橋莊小兒陂茂草盈園公每使驅數群

羊散牧其上曰芳草多情賴此粧點按此莊後為宋張齊賢所

得

周諫議大夫賈禹鈞故居也在南達義塾四十餘

楹聚書數千卷禮文儒延置師席凡四方有志於學者聽其自

至貧無供需者咸資之

孝治

西漢孝子蔡順董永所居

外

李德裕

經始平泉追先志也吾隨侍先太師忠公在

外十四年上會稽探禹穴歷楚澤祭巫山遊沅湘望衡嶠忠公

每維舟清眺意有所感必悽然遐想屬在伊川常賦詩曰龍門

南嶽盡伊原草樹人烟目所存正是北川梨棗熟夢魂秋日到

郊園吾心感是詩有退居伊洛之志前守金陵予龍門得喬居

士故居天寶末避地遠遊首陽微岑尚有薇蕨山陽舊徑唯餘

竹木吾乃廢荆棘驅狐狸始立班生之宅漸成應叟之地又得

江南珍木奇石列于庭際平生素懷於此足矣吾常以為出處

者貴得其道進退者貴不失時古來賢達多有遺恨至於玄祖

潛身于桂史柳惠養德於士師漢代邴曼容官不過六百石終

無辱殆不可及矣越蠡激文牛以肥遯留侯託黃老以辭世亦

其次焉范曄感蔡澤一言超然高謝鄧禹見功臣多敗委遠名

勢又其次也矧如吾者于葵無衛足之智處鴈有不鳴之患雖

有泉石杳無歸期留此林居貽厥後代鬻平泉者非吾子孫也

以平泉一樹一石與人者非佳子弟也吾百年之後為權勢所

奪則以先人所命法而告之此吾志也詩曰維桑與梓必恭敬

止言其父所植也昔周人之思召伯愛其所憩之樹近代薛令

君於禁省中見先祖所據之石必泣然流涕汝曹可不慕之唯
巖為蒼之為陵然後已焉可也

寺觀

事物紀原漢明帝時攝摩騰竺法蘭始自西域以白
馬馱經來初止鴻臚寺遂取此寺名徇白馬寺

白馬寺 天竺國有伽藍名招提其處大富有惡國王利其財
將毀之有一白馬繞塔悲鳴即停毀自後改招提為白馬

寺 奉化縣西北雪竇山中有寺唐時建宋淳祐中賜御書應

夢名山四大字真如寺 在台州府西南宋李輔詩括蒼山上

雲山好雲亦好可憐山下僧看雲不知老 **金山寺** 在潤州金

山上唐有頭陀斷手以建伽藍忽一日江邊獲金數鎰表因

賜名金山寺又湖廣武昌府興國州北有銀山寺蘇軾與李仲

覽過此書鐵壁二字世傳以為銀山鐵壁 **鐵塔寺** 寺在應天

府西北岡上劉宋時建前有二鐵塔因名又揚州城內有石塔

寺舊名木蘭院即唐王播題詩處宋改曰石塔寺 **鶴林寺** 在

潤州黃鶴山上舊名竹林寺劉宋高祖微時常獨卧講堂上有

五色龍章及登極改今名孝液題寺中僧室詩終日昏昏醉夢

間忽聞春盡強登山因過竹院逢僧話偷得浮生半日閑 **塔星**

寺 黃山谷詩落星開土深結屋龍閣老翁來賦詩小雨蔽山

客坐久長江接天帆到遲宴寢清香與世隔畫圖妙絕無人知

蜂房各自開戶牖處之者茶藤一枝按南康府彭蠡湖西北有

落星湖湖有小山相傳星墜水所化又陳王僧辯破侯景于落
星灣及宋孟太后過落星寺舟覆宮人溺死者十數惟太后舟
無虞皆此處也**長干寺** 在金陵聚寶門外吳赤烏間有康居
國異僧領徒至長干里結茅行道能致如來舍利孫權為建塔
奉焉名寺曰建初實江南塔寺之始梁名長干寺宋改名天禧
明朝永樂初徹其舊而斥大之賜名大報恩寺按聚寶門外地
名有大長干小長干寺在其中也江東人謂山隴之間曰干大
果寺 在南康府建昌縣治東唐大曆間建因寺有梨樹大如
斗故名**祥符寺** 在南康縣治東北宋時建邑人鍾福隸業于
此手植小松一夕夢朱衣玄冠者告曰松圍三尺子當策名後

三十始登科南歸視松果如所夢**湘宮寺** 劉宋虞愿為散騎
常侍明帝起湘宮寺費極奢侈又起莊嚴刹十層不可立分為
兩刹各五層帝曰卿至湘宮寺未我起此寺是大功德愿曰陛
下起此寺皆是百姓賣兒販婦錢所為佛若有知當慈悲哀愍
罪高浮圖何功德之有帝怒使人馳曳下殿**戒珠寺** 越州戒
珠寺即王羲之宅也有洗硯池水常黑色**醴泉寺** 寺在鄒平
縣豐堂山下宋范仲淹讀書時嘗見窖銀覆之不取後僧未修
寺資公使裁銀適周子用**寒山寺** 在蘇州城西十里楓橋之
傍唐張繼有楓橋夜泊詩又武昌有寒溪寺初陶侃刺廣州有
漁者得金文殊像于海上乃阿育王所造也侃送諸武昌寒溪

寺及保督江州使迎像來江州積十力不能動比入舟舟輒沒
遂已其後東林寺成慧遠默額之像冷然自至慧遠為建閣以
事之**鼓山寺** 宋趙汝愚詩幾年奔走厭塵埃比日登臨亦快
哉江月不隨流水去天風常送海濤來朱文公滴詩中天風海
濤字題扁巖次山有水龍吟題于壁**安國寺** 唐憲宗元和中
吐突承璀領功德使盛修安國寺奏立聖德碑先構樓請學士
撰文欲以萬緡酬之上命李絳為之絳言堯舜禹湯未嘗立碑
自言聖德惟秦始皇刻石高自稱述未審陛下欲何所法且叙
修寺之美豈所以光聖德耶上命曳倒碑樓承璀言樓大不可
曳上厲聲曰多用牛曳之承璀不敢言乃用百牛曳之遂倒**悟**

真宗 藍田玉潤山有悟真寺高僧于此寫涅槃經拜鶴自空
中飛來啣水添硯**國清寺** 寺在台州府天台縣北十里舊名
天台後名國清隋煬帝為智顓禪師建唐僧一行禪師嘗于此
築茅杜荀鶴詩一到天台寺高低景旋生共僧巖上坐見客海
邊行野色人耕破山根浪打驚忙時向閑處不覺有閑情宋晏
殊類要齊州靈巖荊州玉泉潤州栖霞台州國清世稱四絕又
龍馬寺在平涼府涇州長武鎮宋太祖微時嘗過此寺僧守嚴
者異其骨陰使畫工圖于寺壁**雁堂** 釋氏要覽毗舍離于大
林為佛作堂形如鴈字一切具是因名鴈堂又西域記昔有比
丘見群鴈飛翔忽有一鴈投下自殞衆曰此鴈垂戒宜旌彼德

于是瘞鴈建塔遂名鴈塔 **龍井寺** 國一大師因獵者導自徑
山重岡之西至于危峯之北有素衣老人前而致拜請師登山
絕頂入五峰之間曰願捨此地為師立錫之所因指大湫謂師
曰吾家若去此湫當涸留一水穴幸勿墟之我將時至而衛師
言訖雲霧晦冥風雨驟作及明既霽湫水盡涸惟一穴尚存謂
之龍井 **道林寺** 唐韋蟾詩石門迥接蒼梧野愁色陰深二妃
冢廣殿崔嵬萬壑間長廊詰曲千巖下靜聽林飛念佛鳥細看
壁書歇經馬暖日斜明蟠踈梁濕煙散暮鴛鴦危 **靈寶觀**
洞玄經曰中黃老君日子既知身藏又當知天地父母之家五
城十二樓真秘於叢霄之觀 **玉局觀** 老君與張道陵至成都

說經處局脚玉床自地而出故以名觀 **真觀** 武夷山第十
六昇真元化洞天昔有神仙降此曰武夷君統錄地仙授館于
此 **崇道觀** 唐崔尚書碑天台山高一萬八千丈周回八百里
其山八重四面如一中有洞天號金庭宮即王子喬修道之處
唐時司馬鍊師承禎居焉賜名崇道觀 **玄都觀** 劉禹錫以屯
田負外郎出牧連州貶朗州司馬居十一年召還京師過玄都
觀見道士植桃其盛若霞作戲贈看花諸君子詩紫陌紅塵拂
面來無人不道看花迴玄都觀裏桃千樹盡是劉郎去後栽未
幾又被謔出牧居十四年復入為郎中重遊此觀蕩然無復一
株惟免葵燕麥動搖春風耳復作玄都觀詩百畝庭中半是苔

桃花淨盡菜花開種桃道士歸何處前度劉郎今又來

類苑叢寶卷之七

類苑叢寶卷之八

帝王門

帝王

帝者天號也王者人稱也皇者煌也考德帝者得其根考威王者得其附考威枝正氣為

帝間氣為臣秀氣為人春秋王者往也人所輸向人所樂歸春秋

考帝王者號也號者功之表也所以表功明德號令臣下者也

白虎通君者群也群天下萬物而除其害者謂之君韓詩明一者

皇察道者帝通德者王謀得兵勝者霸晉明玉制其臣下者二

柄而已矣二者刑德也殺戮之謂刑慶賞之謂德韓子董子曰

古之人造文字者三畫而連其中謂之王三畫天地人也連中

者通其道也 孔子曰商汝知君之為君乎子夏曰魚失水則死水失魚猶為水也子曰商知之矣尸子淮南子曰帝者體太一王者法陰陽霸者則四時君者應六律 人主者以天下之目視以天下之耳聽以天下之智慮以天下之力動喜不以賞賜怒不以罪誅 始生之者天也養成之者人也能養天之所生而為天子春秋五帝先道而後德故德莫盛焉三王先德而後事故事莫切焉五霸先事而後兵故兵莫強焉全上帝玉世紀化合神者稱皇德合天地者稱帝仁義合者稱王 六韜曰王者之道如龍之首高居遠望深視而審聽神其形而散其精若天高而不可極若川深而不可測 皇者天人之統義大之

稱 易緯帝者天號也德配天地不私公位稱之曰帝 天子者父天母地以養人至尊之號也 呂氏春秋帝者天下之所適王者天下之所往也 陸子三皇垂拱五帝垂手唐虞接轡禹湯馳轆 白虎通三皇步五帝驟三王馳五霸駕呂氏春秋德衰世亂然後天子利天下國君利國 飛龍在天大人造也易聖人作而萬物覩上履帝位而不疚光明也履大人以繼明照四方雜聖人大寶曰位何以守位曰仁何以聚人曰財易踐作臨祭祀內事曰孝王某外事曰嗣王某曲
龍潛舊宅 唐興聖寺舊宅元年以為通義宮六年高祖臨幸大宴群臣引見鄰里父老頒賜有差正觀元年立為高祖寢室

臨幸故鄉

唐正觀十五年并州僧道老人等抗表以太原王業所自明年登封已後願時幸上賜宴從容謂曰飛鳥過故鄉猶躑躅徘徊况朕於太原起義兵遂定天下復小遊觀誠所不忍欲禮若畢或冀與公等相見飛龍之瑞玄宗在潛邸與宋王等同居于興慶里時人號曰五王宅本名隆慶坊及景龍末宅內有龍池涌出望氣者云有天子之氣中宗數幸其地舍泛舟仍馳象踏氣以厭之竟為飛龍之地目是池立興慶宮元宗開元十年幸潞州改舊宅為飛龍院建寺錫名西京應天寺本後唐文馬營大中祥符二年以大祖誕聖之地建寺錫名

魂魄思沛

漢高祖沛作歌慷慨傷懷曰游子思故鄉吾萬歲

後魂魄猶樂沛也其以沛為湯沐邑復其民世世無所與常遊

鄆社

漢宣帝為皇曾孫喜遊俠鬪鷄走馬數上下諸陵周偏

三輔嘗困蓮勺鹵中尤樂鄆社之間率常在社下佳氣鬱鬱

光武紀初謁者蘇伯阿望春陵氣鬱上帝主之師黃帝

師風后顓頊師老彭帝嚳師祝融堯師務成昭舜師紀后禹師

墨如湯師伊尹文武師姜尚周公師庶秀孔子師老聃此十一

君皆聖人也猶待學問論或云黃帝師力牧顓頊師摎圖帝

嚳師赤松子堯學於君疇舜學於務成昭禹學於西王國豐沛

故人沛公初起相工入豐沛之市云多封侯之人盧綰與高

祖同居豐邑微時博奕陳遵祖父遂字長子宣帝微時與有

項元卷之六

三

故相隨博奕數負及宣帝即位遂為大原太守乃賜璽書曰太

守官尊祿厚可以償博矣

見星門

嘗同硯席

劉

弘字弘季少家南陽與光武同居永安里又同年共硯席光

武初學長安往來南陽資用乏與同舍生韓子合錢買驢令後

僦以給諸公之費光武學長安時過朱祐留上待講竟又談

話及帝登位幸祐第問曰得無忘我講乎祐曰不敢光武與

吳漢同居白水鄉**為置守冢**張安世兄賀為掖庭令牧養宣

帝後為賀置守冢三十家**白首相見**薛振字元起牧之子高

宗謂元起曰我昔在春宮與卿俱以壯倏忽已三十年與卿白

首相見歷觀書傳共白首者幾人**帝垣小星**祖宗居潛與趙

韓王遊長安時陳搏乘一騾遇之下騾大笑巾簪幾隊左手握

太祖右手挽太宗曰可相從市飲乎祖宗曰與趙學究三人並

游睥睨韓王甚久徐曰也得也得非渠不可與此帝既入酒舍

韓王脚踏偶坐席右陳怒曰紫微帝垣一小星輒據上次可乎

斥之使居帝左

野山錄

符命

春秋潛潭苞曰里社鳴此里有聖人其响鳴也百姓

文綠色甲以龜背五色有列星之分斗政之度帝王紀錄興亡

之數尚書中候伯禹曰臣觀河伯面長人首魚身出水曰吾河精也

授臣河圖全天乙東觀乎雒降三分壁黃魚復躍出化為黑

玉赤勒曰玄精天乙受神福伐桀克今赤雀銜丹書入鄴昌拜稽首受最最要者也曰姬昌蒼帝子呂尚釣磻溪得玉璜刻曰姬受命呂佐理也武王渡孟津白魚躍入王舡長三尺有文王字中雒書靈准聽曰舜受終鳳皇儀黃龍感朱草生黃炎滋西王母授益地圖尚書璇璣鈴曰禹開龍門導積石玄圭出刻曰延喜玉受德天賜佩紂之時五星聚於房上者蒼神之精周據而興元命包漢元年五星聚東井從歲星也光武夜生時有赤光室中盡明王長卜之曰此善事不可言是歲有嘉粟一莖九穗縣界大豐熟曰名曰秀晉書曰太安中木土水金四星聚於牛女之間後中宗即位於揚州晉天福中兩浙兒童

聚戲率以趙字為語助如言得曰趙得可曰趙可語言無不以趙字無之者及晉宋趙延壽貴盛浙人謂必應謚延壽為北虜所繫而謠言甚盛太祖果受禪武昌記曰孫權獵於樊山見一姥問獵何得答曰只得一豹姥曰何不擊其尾忽不見曰立樊姥廟

應運

太皞氏以龍紀官故為龍師炎帝以火紀官故火師而火名黃帝以雲紀官故為雲師而雲名少昊擊之立也鳳鳥適至故紀於鳥為鳥師而鳥名自顓頊以來不能紀遠乃紀於近為民師而命以民事則不能改也湯受金符帝錄曰振銜鉤入殷朝漢承堯運德祚已盛斷蛇著符

旗幟尚赤協于火德自然之應得天統矣 少昊邑于窮桑以
登帝位都曲阜故或謂之窮桑 顓頊有聖德父昌意雖黃帝
之嫡以德劣降居若水諸侯及顓頊生十年而佐少昊十二而
冠二十登帝位 帝嚳有聖德十五佐顓頊三十而登帝位
帝堯十五而佐帝嚳受封於唐為諸侯身長十尺嘗夢天上之
故年二十而登帝位 湯放桀而歸於亳三千諸侯大會湯取
天子之重置之於天子之座左復而再拜從諸侯之位湯曰此
天子之位有道者可以處之矣夫天下非一家之有也有道者
之有也故天下者唯有道者理之唯有道者宜處之湯以此三
讓三千諸侯莫敢即位然後湯即天子之位 神農之時天雨

粟神農耕而種之作陶冶斤斧為耜鉏耨以墾草莽然後玉穀
興以助果菘實 神農以為走禽難以久養民乃求可食之物
嘗百草實察鹹苦之味教民食穀

聖誕

誕彌厥月詩五百年必有王者興孟或問五百歲而
聖人出有諸曰堯舜禹君臣也而並文武周公父子
也而慶湯孔子數百年而生曰往以推來雖千世亦可知也

瑞光貫月

瑞光如蜺貫月正白感女樞於幽房之宮生黑帝
顓頊履途而生 遂人之世有大迹出雷澤華胥履之生庖犧
氏於成紀 世紀 帝嚳元妃姜嫄以春分玄鳥至之日從祀郊禘
見大迹履之而生后稷 世紀

虹下流華渚

大星如虹下流華渚

顓頊履途而生

大星如虹下流華渚

女節感而生白帝金天氏感應**雷繞斗樞**神農氏之末必與

氏娶附寶見大電光繞北斗樞星照郊感附寶孕二十月生黃

帝於壽丘世紀**十四日生**堯母慶都出觀山河奄然陰風赤龍

與慶都合孕十四月生堯 鈞戈夫人趙婕妤好妊身十四月生

昭帝上命其門曰堯母門**感樞星生**舜母感樞星之精而生

尚書帝命驗握登見虹意感而生舜詩含神霧**流星貫昂**脩己山行

見流星貫昂意感慄然肯圻而生禹墨子**吞乙而孕**帝嚳少

妃有娥氏女簡狄以春分玄鳥至之日祀于高禘有玄鳥遺卵

簡狄吞之孕生契**白氣貫月**湯母扶都見白氣貫月意感而

生湯詩含神霧**靈通神遇**高祖母媪嘗息大澤之陂夢與神遇時

雷電晦冥父太公往視見蛟龍於上已而有娠遂產高祖**夢白**

入懷景帝王后夢日入懷以七月七日生武帝於猗蘭殿武帝

故事**赤光照室**光武以建平元年十二月甲子夜生於濟陽縣

舍有赤光照室光武生時有嘉禾一莖九穗縣境大熟因名秀

東觀漢記**雲龍之瑞**唐太宗生於武功之別館時有慶雲見瀟漫

數里上屬於天二龍戲於館門之外水中經三日乃去**夢日而**

娠太祖母昭憲皇后嘗夢日入懷而娠生之夕光照室中

夢神捧日太宗母昭憲皇后夢神人捧日置于懷遂有娠生

帝赤光滿室**夢日隊裾**仁宗皇帝母章懿皇后李嘗夢二日

在天其一忽墜以裾承之自是有娠**夢赤脚仙**章懿李后忽

夢一羽衣之士跣足從空而下云來為汝子時上未有嗣聞之
大喜云當為汝成之是夕台幸有娠明年誕育昭陵而幼年每
穿履屨即至令脫去常徒步禁中皆呼為赤脚仙人赤脚仙人
蓋古之得道李君也赤光照天秀州外醫張浩自云少隸軍
籍嘗為德清閭官一日晚出郊過嘉興縣忽覩丞廳赤光照天
疑為回祿亟入視之乃趙縣丞之室適免娠得雄是誕育孝宗
也揮塵

聖壽

五福一曰壽書萬壽無彊詩君子萬年介爾眉福如
南山之壽詩故大德必得其壽中庸天錫皇帝與天
亦皇壽韓文黃帝百十歲少昊百歲顓帝九十八歲帝嚳百歲堯

帝百十八歲帝舜百十歲禹湯皆百歲文王九十七歲武王九
十三歲文王謂武王曰汝何夢矣對曰夢帝與我九齡文王
曰古者謂年終也我百爾九十吾與爾三焉

聖學

書人心惟危道心惟微惟精惟一允執厥中 惟學
遜志務時敏厥修乃來允懷于茲道積于厥躬惟敷
學半念終始典學廢德修罔覺 詩穆穆文王於緝熙敬止
日就月將學有緝熙于光明 孟子湯之於伊尹學焉而後臣
之故不勞而王 新序子夏對哀公曰黃帝學于大真顓帝學
于錄圖帝嚳學于赤松堯學于君疇舜學于務成昭禹學于西
王國湯學于成子伯文王學于時子思武王學于號叔表章六

經 班固曰漢高帝撥亂反正文景務在養民至于稽古禮文之事猶多闕焉孝武初立卓然罷黜百家表章六經 倪寬見武帝語經學上曰吾始以尚書為撲學弗好及聞寬說乃從受一篇**講論五經** 漢宣帝受詩于東海濱中翁年十八師受論語孝經甘露三年詔諸儒講五經異同於石渠閣蕭望之等平奏上親稱制臨決**講論經理** 光武數召公卿即將講論經理夜分乃寢樊準疏光武中興授戈講藝息馬論道**金縢四經** 明帝為皇太子治尚書備師法受書於桓榮無不通四經畧舉大義博觀群書以助術學及即位躬臨辟雍行養老乞言之禮諸儒執經問難**講議五經** 章帝隆意儒術特好古文尚書左氏

傳建初四年召博士議郎及諸儒會白虎觀講論五經同異作白虎議奏一篇**好石渠道** 和帝孝順聰明寬和仁孝初治尚書兼覽書傳好古樂道無所不照以五經義異書傳意殊辛東觀覽書林閣篇籍**劄情經術** 唐太宗身屬察韃銳情經術即王府開文學館召名儒十八人為學士既即位置弘文館悉引學士更番直宿討論古今文籍詔天下家藏孝經**留意墳典** 唐憲宗留意墳典每覽前代興亡得失之書皆三復其言又集前代君臣事迹書于屏風**手不釋卷** 宋太祖初為周將時雖在軍中手不釋卷間有奇書不吝千金購之顯德初從周世宗平淮有諧之者曰趙匡胤私有重車數乘世宗遣人察之

果然令引八面開之惟書數千卷世宗異之且曰卿方為將帥
當堅甲利兵何用書為太祖頓首曰第無奇謀上贊聖德所以
聚書者放廣聞見增智慮也世宗曰善太祖謂宋琪曰朕性
喜讀書開卷有益每見前代廢典以為鑒戒每暇日則問侍讀
呂文仲以經義侍書王著以筆法寫端以字學朱文公謂太
祖不為言語文字之學而方寸之地直與堯舜合是也**留意經**
術仁宗萬幾之下留意經術雖寒暑不輟慶曆五年幸通
英閣講詩匪風篇曰誰能烹魚溉之釜鬻帝曰老子謂治大國
如烹小鮮與此同否丁度對曰烹魚煩則碎治民煩則散仁
宗謂王曾曰兩漢書文辭溫雅唐書終不及也曾退相謂曰上

閱經史見前代述作之体且善評之自昔好文之主未嘗留意
及此**戒在中止**英宗嘗謂侍臣曰九學之道戒在中止故視
事畢不俟進食即御經筵**風雨不易**神宗聰明英睿每論經
史出入意表通英講讀風雨不易禁中觀書或至夜分一日孫
思恭侍讀講孟子至多助之至天下順之寡助之至親戚畔之
思恭遂引古今助順之事而不及親戚畔之者帝顧曰微子紂
之諸父掩祭器而奔周非親戚畔之耶思恭再拜稱服明睿**惟**
看文字哲宗時起居舍人王巖叟因侍講奏曰陛下退朝無
事何以消日帝曰惟看文字對曰陛下以讀書為樂天下幸甚
夜讀尚書高宗居常禁中自有日課夜讀尚書率二鼓乃罷

日盡一卷

孝宗謂講官曰進講三朝寶訓幾時終篇朕樂聞祖宗謨訓雖日盡一卷亦未為多惟書經史理宗臨太學御崇化堂命祭酒曹夬講禮記大學篇端平元年詔真德秀進講大學衍義嘉熙元年詔經筵進講朱熹通鑑綱目

禮賢

孟子曰用上敬下謂之尊賢周公曰吾不如者吾不與處累我者也與吾齊者吾不與處無益我者也惟賢者必與賢於己者處賢者之可得與處也禮之也春秋郭隗曰帝者之臣其名臣也其實師也王者之臣其名臣也其實友也霸者之臣其名臣也其實賓也危國之臣其名臣也其實虜也今王將東面目指氣使以求臣則厮役之材至矣南

面聽朝不失揖讓之禮以求臣則人臣之材至矣西面等櫬相允下之以色不乘勢以求臣則朋友之材至矣北面拘拘說而退以求臣則師傅之材至矣說平津侯自以布衣為宰相乃開東閣營客館以招天下之士其一曰欽賢館以待大賢次曰翹材館以待大才次曰接士館以待國士其有德任毗贊佐理陰陽者處欽賢之館其有才堪九列將軍二十石者居翹材之館其有一介之善一方之藝居接士之館而躬自菲薄所得俸祿以奉待之戰國策云靖郭君善齊貌辯齊貌辯之為人也多燕門人席說士尉以證靖郭君靖郭君不聽士尉辭而去孟嘗君又竊以諫靖郭君大怒曰刻面類破吾家句可憐齊貌辯

者吾無諱為之於是舍之上舍令長子御之旦暮進食典略云
范蠡楚宛人被髮佯狂文種為宛令遣吏奉謁曰士有賢聖之
資必有佯狂之義駕車而往 國語范蠡諱於王曰君王勉之
臣不復入於越國矣遂乘輕舟以浮于五湖莫知其所終極王
命工以良金寫范蠡之狀而朝禮之 說苑云魯人攻鄭曾子
諱子鄭君曰請出寇罷而後復來請姑母使狗豕入吾舍鄭君
曰寡人之於先生也人無不聞今魯人攻我而先生去我我胡
守先生之舍魯人果攻鄭而數之罪十而魯子之所爭者九魯
師罷鄭君復修曾子之舍而後迎之 戰國策云先生王斗造
門而欲見齊宣王宣王使謁者延入王斗曰斗趨見王為好勢

王趨見斗為好士於王何如使者還報王曰先生徐之寡人請
從宣王因趨而迎之於門 說苑周公攝天子位七年布衣之
士執贄所師見者十二人窮巷白屋所先見者四十九人時進
善者百人教士者千人官朝者萬人 說苑云齊桓公設庭燎
為士之欲造見者甚年而士不至於是東野鄙人有以九九之
術見桓公曰九九何足以見乎鄙人對曰臣非以九九為之以
見也夫九九薄能而君猶禮之况賢於九九乎桓公曰善乃因
禮之朞月四方之士相携而至 新序晉平公浮西河中流
而歎曰嗟呼安得賢士與華比樂者船人固素進對曰君言過
矣夫劍產於越珠產江漢玉產崑山此三寶者皆無之而至今

君苟好士則賢士至矣 抱朴子曰善用木者不以膚才之盤
節而捐于雲之梓善用用者不以名行之不著而遺治世之才
禮記論進士之賢者以告于王論定然後官之位定然後爵
之任事然後祿之 易拔茅茹以其彙征 鴻漸于陸其羽可
為儀 書惟后非賢不乂惟賢非后不食 明明敷仄陋野無
遺賢 數求哲人 旁求俊彥 聿求元聖 所寶惟賢則通
人安 詩我求懿德 濟濟多士文王以寧 樂只君子邦家
之光 說苑人君之欲平治天下而垂榮名者必尊賢而下士
築黃金臺 燕昭于易水東南築黃金臺以延天下之士師事
郭隗可使絕國 元封元年詔曰蓋有非常之功必待非常之

人故馬或奔蹏而致千里士或有負俗之累而立功各夫泛駕
之馬跡弛之士亦在御之而已其令州郡察吏民有茂材異等
可為將相及使絕國者**罪不舉者** 元朔元年詔曰朕詔執事
興廉舉孝或至閭郡而不薦一人是化不下究而積行之君子
雍於上聞也其議二千石不舉者**罪** **讀車** 建武七年詔
曰比陰陽錯謬日月薄蝕百姓有過在予一人公卿司隸州牧
舉賢良方正各一人遣詣公車**唯在得賢** 唐高宗謂侍臣曰
四海之廣唯在得賢卿等用人多存形迹護避親知其為不取
祈察舉子以為美談即使卿等見姪有才須依例進舉 **親選**
士 宋太宗雍熙中親試貢士于崇政殿始分三甲錫宴瓊林

苑寵之以詩遂為定制謂侍臣曰朕親選多士殆若饑渴庶野
無遺賢各舉才行英宗謂輔臣曰館閣所以育俊才比欲選
人出使無可者豈乏才耶又曰卿等為朕各舉才行無善者數
人雖親戚世家勿嫌朕嘗親閱可否置籍書屏宋高宗謂宰
執曰朕思安民之道無過擇監司郡守可令侍從公舉仍不限
員數中書置籍朕亦書之屏風置諸左右

愛民

如志窮民

史云唐堯存心于天下加志于窮民一
民饑則曰我饑之也一民寒則曰我寒之也一民有
罪則曰我陷之也故不賞而民勸不罰而民治澤及枯骨新
序周文王作靈臺掘地得死人骨王曰更葬之吏曰此無主矣

文王曰有天下者天下之主有一國者一國之主寡人固其主
矣以衣棺葬之天下聞之曰西伯澤及枯骨况于人乎有喪

勿絲

漢宣帝地節四年詔曰百姓遭凶而絲使不得葬傷孝

子心自今有大父母父母喪者勿絲使得送終以盡子道無家

給穀

建武六年詔曰水旱蝗虫為災人用困乏無以自贍惻

然憫之其命郡國有穀者給廩高年鰥寡孤獨及鳶廢無家屬
貧不能自存者如律廩必與貧章帝元和二年詔嬰兒無親

屬者及無子不能養者廩給之死後贖生貞觀五年以金帛

賜突厥贖回男女八萬口又遣使詣高麗葬戰士十九年贖諸
軍所虜高麗民一萬四千口欲人富貴太宗謂侍臣曰若禾

黍不收則兆庶非國家所有朕嘗欲天下之人皆富貴惟首徭
役薄賦歛令比屋之人恣其耕稼如此則富矣敦行禮讓使人
少敬長妻敬夫如此則貴矣令天下皆然朕不聽管弦不從田
獵樂在其中矣太宗覽明堂鉞多圖人五職之系咸
附子背詔自今毋得答囚背**定折杖** 宋太祖嘗讀二典嘆曰
堯舜之罪四凶止從投竄何近代法網之密耶故定為折杖法
以通減流徒杖笞之刑惟臧吏棄市則未嘗貴出米資饑周
世宗時淮南饑命以米貸之或曰民貧恐不能償世宗曰民吾
子也安有子倒懸而父不為之解哉安在責其必償也空座療
疾 宋仁宗時京師大疫帝出犀角二株付水醫局和藥賜貧

民其一通天犀也內侍請留以為御帶帝曰以為朕帶孰若為
藥以療民疾立命碎之開田養民 天聖七年契丹饑流民至
境上帝曰皆吾赤子也語給唐鄧州開田以養之仍令所過給
食置廣惠倉 嘉祐二年詔諸州置廣惠倉初天子沒入戶
絕田官自墾之至是韓琦請留勿墾募人耕而收其租別為倉
貯之以給州縣之老幼貧疾不能自存者謂之廣惠倉
勤政 書明王奉若天道建邦設都樹后王君公承以大夫
師長不惟逸豫惟以亂民 允我造邦無從匪彞無
即惰淫各守甬典以承天休 無康好逸豫乃其乂民 嚴恭
寅畏天命自度治民祗懼不敢荒寧

躬親本事

漢文帝除秦亂法躬親本事廢去淫末以安海內

以育群生夜分乃寐

光武每旦視朝日昃乃罷夜分乃寐曰

我自樂此不為疲也深夜方寢唐太宗謂裴寂曰比多上書言

事者朕皆黏之屋壁得出八省覽數思治道或深夜方寢公輩

亦當恪勤職業副朕此意政事脩飭唐文宗銳意圖治每延

英對宰臣率漏下十一刻乃退允除吏必召見訪問親察其能

否故太和之初政事脩飭號為清明謹事息樂唐憲宗嘗盛

夏召李絳對延英殿帝汗浹衣絳欲趨出帝曰與卿講事乃甚

樂也日中未食宋太宗每旦決事日中未食嘗語近臣曰天

下事日日聽斷尚恐不及唐末諸帝多深居何也投籤階

陳文帝起自布衣知百姓疾苦每夜敕雞人伺漏傳籤于殿中者令投籤于階石上踳然有聲吾雖得眠亦令鷄覺自強如此

納諫

書惟木後繩則正惟后後諫則聖從諫弗咈有言逆于汝心必求諸道稽于衆舍己從人易君

予以虛受人

置鼓之采

唐紀堯置敢諫之鼓使天下得盡其言立誹謗

之木使天下得攻其過懸鐘待士

夏紀大禹懸鐘鼓磬鐸鞀

以待四方之士曰教寡人以道者擊鼓諭以義者擊鐘告以事者振鐸語以憂者擊磬有獄訟者搖鞀威王三賞齊威王令下曰有能面折寡人者受上賞獻書諫者受中賞諉議於市朝

而聞者受下賞梁君獵見梁君獵見白鴈群欲射之道有
 行者梁君止之不止鴈群駭曰怒欲射行者公孫龍諫曰昔齊
 景公時天大旱卜曰當以人祠乃雨公下堂頓首曰九吾所以
 求雨者為民也今使吾以人祠惡在其為民耶言未卒而天大
 雨今君以鴈故而欲射人是主君無異于狼虎也梁王遂接龍
 手與上車歸曰幸哉人獵得禽數吾獵得善言也止輦受言
 漢文帝時每朝即從官上書疏未嘗不止輦受其言言不可用
 置之言可用采之罷黜方士漢武帝征和四年大鴻臚田千秋
 上言曰方士言神仙者甚衆而無顯功臣請皆罷斥遣之上
 曰鴻臚言是也于是悉罷黜方士佞神人者悔責老博唐太

宗使太常少卿祖孝孫教官人音樂不稱旨帝責之温彦博與
 王珪諫曰孝孫雅士乃使之教官人又從而責之臣竊以為不
 可帝怒曰朕實卿等于心腹乃附下周上為孝孫遊說耶彦博
 拜謝王珪不拜曰陛下責臣以忠直臣所言豈私曲耶比乃陛
 下負臣非臣負陛下帝默然而罷明日帝謂房玄齡曰納諫誠
 難朕責温彦博王珪今則悔之罷學東都唐敬宗幸東都
 大臣切諫不納裴度從容奏云國家建別都本備巡行自艱難
 以來宮闕署地荒地不治須假一新然後可行倉卒無備有司
 且得罪矣帝曰群臣諫朕不及此固為止行何所鄭文唐太
 宗時鄭仁基息女義而才皇后請建為充華典冊已具或言真

已許聘矣魏徵諫曰陛下處臺榭則欲民有棟宇享膏粱則欲民有飽食顧嬪御則欲民有室家今聞鄭女已約婚陛下取之豈為民父母之意哉帝痛自咎責即詔停冊立遣三女宋仁宗時王德用進二女王素論之上笑曰朕真宗子卿王旦子有世舊非他人比德用進女然已在朕左右奈何素曰臣之憂正恐在陛下左右耳上立命宦官遣女素曰陛下既不棄臣言亦何遽也上曰朕若見其人留戀不肯行恐亦不能出矣頃之宦官奏宮女已出內東門上乃起焚香讀疏唐宣宗樂聞規諫凡諫官論事苟合于理常屈意從之得大臣疏章必焚香盥手讀之觀圖長吁宋神宗時東北天旱詔求直言鄭俠上疏民

圖疏奏帝反覆觀圖長吁數四袖以入內是夕寢不能寐翌日遂命開封體勘新法不便者九十八事罷之康燭讀宋孝宗時朱文公進封事疏入夜漏下七刻帝已就寢亟起秉燭讀之終篇明日除去管亞太乙宮無崇政殿說書公力辭乃以秘閣修撰奉祠論詔覆事唐王諤賂權近求無宰相密詔尚書門下曰諤可無宰相李藩遽取筆減宰相字書其左曰不可還奏之宰相權德輿失色曰有不可應別為奏何以筆塗詔耶藩曰勢迫矣出今日便不可既而事得寢願女驍設宴唐高祖每與杜正倫虞世南等論事稱帝為設宴具召正倫等謂曰我聞神龍可擾而馴然願下有逆鱗嬰者死人君亦有之卿屬

犯吾鱗裨闕失朕豈慮有危亡哉目思卿至意故舉酒以相樂
耳親擇良笏 唐吐突承璀欲于軍中為帝立聖政碑龍石請
文內相李絳奏言大人與天地合其德無立碑紀德之事恐貽
笑天下憲宗初甚怒絳語不已卒大開悟除絳中書舍人翌日
面賜紫衣金魚又親擇良笏賜之曰勉曰爾當無易此心

節儉

周書曰文王在鄩召太子發曰吾括柱而茅茨為人
愛費 墨子曰堯堂高三尺土階三等茅茨不翦

尸子曰人言居天下者瑤臺九累而堯白屋黼黻九種而堯大
布宮中三市而堯鶉居 淮南子曰人之所以樂為天子者以
其窮耳目之欲而適躬體之便也今高臺曾榭人之所麗也而

堯采椽不斲斤題不斫珍恠奇味人之所羨也而堯糲梁之飯
藜藿之羹文錦狐白人之所好也而堯布衣掩形鹿裘禦寒養
生之具厚不加增 武帝問東方朔曰吾欲化民豈有道乎朔
對曰願近述孝文皇帝之時當世耆老皆聞見之貴為天子富
有四海身衣弋絺足履革屨以韋帶鈞莞蒲為席集上書囊為
殿帷 節以制度不傷財不害民為首况曰是國之道節用裕
民而善藏其餘節用以禮裕民以政 論語禹惡衣服而致美
乎黻冕 書文王卑服即康功田功 漢文帝在位躬行節儉
景帝禁采黃金珠玉 光武詔大官勿受遠國珍羞

屏惡刻鏤

章帝南巡過汝南郡太守何敞有刻鏤屏風帝不

悅命侍中黃香銘之曰古典務農雖饑傷民志在竭節義在脩
身由是故有懼心管閔指費貞觀二年公卿奏曰季夏之月
可以慶臺榭請營一閣帝曰樂費良多豈為民父母之道也竟
不許焚雉頭裘晉武帝時太醫司馬程據獻雉頭裘命焚之
于殿前御牛青絲紉斷詔以青麻代之青練為帷晉元帝性
簡儉冲素有司農太極殿廣室施絳帳帝曰漢文集上書囊為
帷朕當效遂令冬施青布夏施青練為帷留納宋高祖微時
有納布衫襖減皇后手所作也既貴以付會稽公主曰後世有
驕奢不節者以此示之至孝武帝壞高祖所居陰室於其處起
玉燭殿與群臣觀之牀頭有土障壁上掛高燈籠麻繩拂侍中

袁顛曰盛稱高祖儉素之德帝曰田舍翁得此已為過矣改用
鐵欄齊高帝性法儉後宮器物欄檻以銅為飾者改用鐵內
殿施黃紗帳宮人着紫皮裘履每曰使我治天下十年當使黃
金與土同價不用龍胎唐宣宗性尚儉素先是宮中行幸即
以龍腦鬱金香藉之于地至是帝皆不許時人方之漢文帝
耒耜去飾唐肅宗耕籍田曰閱耒耜有雕刻文飾曰田器農
人執之在于朴素豈貴文飾乎乃命撤之衣成寬大唐文宗
元夕觀燈諸公主並赴宴延安公生衣裾寬大即時遣歸駙馬
竇焜待罪詔奪兩月賜錢衣成火生宋太祖性節儉宮中垂
筆簾緣用青布常服之衣澣濯至再魏國長公主襦飾翠羽戒

勿復用皇女永寧公主嘗衣貼繡鋪翠襦帝曰翠羽價高小民
逐利傷生浸廣實汝之由我以四海之富宮殿悉用金玉為飾
力亦可辨但念為天下守財耳碎瀆宋太祖見蜀主孟昶
寶裝瀆器即碎之曰汝以七寶飾此當以何物貯食所為如此
不亡何待不索燔羊宋仁宗語近臣曰昨因不寐而饑思食
燒羊近臣曰何不索取曰恐遂為例何不忍一夕之饑而答無
窮之殺或獻蛤蜊二十八枚枚千錢曰一下筋費二十八吾不
堪也遂不受其獻

賞賜

說文賞賜有功也賜也者命也惠也書功懋懋賞
用命賞于祖功多有厚賞春秋傳古之理人者勸

賞而畏刑賞以春夏將賞為之加膳加膳則飫賜此所以知其
勸賞也天有雨露生育萬物聖人體之則有慶賞之典夫
賞賜者以悅下使眾相範傳賞國之典也藏於盟府不可廢也
賞罰無章何以沮勸善則賞之以勸能者管子開必得
之門信慶賞也大德不旋則勸善之道缺矣大勤不賞則報
功之典廢矣左傳賞借則悞及淫人傳有勲者撫之以獎
器撫授也文子善賞者費少勸多故聖人賞一人而天下趨
之是以至賞不費也禮臣下竭力盡能以立功於國君必報
之以爵祿故曰禮無不答言上之不虛取于下也月令慶賜
遂行無有不當禮天子之為樂也以賞諸侯有德者也周

禮司勳掌賞地以等其功 大府以敝餘之賤以待賜子 以九式均節財用八曰匪頒之式式謂財用之節度也匪分也頒賜也謂分賜群臣 管子明賞不費明刑不暴賞罰明德之至也 淮南子忠臣之事君也計功而受賞不為苟得量力而受管不貪爵祿其所能者受之勿辭也 左傳為政者不賞私勞不罰私惡 韓非子賞者貴信 呂氏春秋賞重則民移 三略軍無賞士不往賞者士之所死 君子不以小言受大祿不以大言受小祿祿賞也

賜禮樂 成王以周公為有勲勞于天下是以封周公于曲阜命魯公世世祀周公以天下之禮樂**晉侯**以樂之半

賜魏絳曰子教寡人和諧戎狄八年之中九合諸侯如樂之和無所不諧請與子樂之魏絳於是乎始有金石之樂**晉侯**以樂之半 晉文公賤臣壺叔曰君三行賞不及臣公曰夫道我以仁義防我以德惠此受上賞輔我以行此受次賞矣石之難汗馬之勞此復受次賞若以力事我而補吾缺者此受下賞三賞之後且及子晉人聞之皆悅**晉侯**以樂之半 晉侯歸國行賞私僎為晉或曰城濮之事先軫之謀文公曰城濮之事僎說我母失信先軫曰軍事勝為右吾用之以勝然此一時之利僎害萬世之功奈何以一時之利而加萬世功乎是以先之**晉侯**以樂之半 晉侯賞桓子狄臣千室亦賞士伯以瓜衍之縣曰非獲狄士子之功也

微子吾畏伯氏 **憚賞不言** 晉王沈遷稱加下教曰能陳長吏
可否說百姓所患者有賞言刺史得失倍賞主簿褚瑋曰上好
下應今示以賞恐拘介之士憚賞不言貪昧之人慕利而妄舉
沈後之 **嘉功賜錢** 祭彤為遼東太守三十年衣無副儲世祖
嘉其功賜錢百萬 彤臨終謂子曰吾蒙國恩而微績不立不
可無功受賞吾死後汝悉薄上所得賜物身効死前行 **賜佩刀**
唐太宗曰貞觀以前由武功定天下間闡草昧玄吟功也貞觀
以後納忠諫正朕違國家長利魏徵而已雖古名臣何以加因
解佩刀以賜二人 **乘馬廷中** 唐王君廓鎮幽州擊突厥俘斬
二千獲馬五十匹入朝帝賜所乘馬令自廷中乘以出 **賜絹帛**

晉張華以平吳之計賜絹百匹唐屈突通平薛仁果珍寶山積
獨無所取特賜絲千段太宗治洛陽宮張玄素上書極諫罷後
賜絲二百匹倪若水諫捕鵠鵠鵠手詔答曰言念忠謹深用
慰喜賜帛四十段用答至言常何薦馬周以何知人賜帛三百
匹 **賜清廟器** 唐李珣作牛僧孺碑特賜清廟冠六事皆範金
飾玉如古時製且宣曰以卿精忠用以貶別 **賜金贖第** 宋呂
端諸子多不同慶舊第以贖于人帝出內庫錢贖還之令其數
居端長子蕃言負入息錢甚多帝別賜內庫金帛俾償之 **賜金**
李晟蕩夷凶惡賜女樂一部永崇里第一區晟入第京兆拱帳
教坊鼓吹迎導之又渾瑊由樓煩郡王徙咸陽大寧里甲第

河間王孝恭討輔公柘生擒之江南平賊曰第一區女樂一部
玉帶錦袍 五代唐主昭聽樂賜教坊使等玉帶錦袍往謝史
弘肇弘肇怒曰健兒為國征討者未有徧賜爾曹何功敢當此
乎悉取所賜還官

封爵

昔黃帝分建萬國至于唐虞別為五等曰公侯伯子男
則虞書所謂輯五瑞修五玉是其制也夏與唐虞同殷

制天子之畿方千里公侯百里伯七十里子男五十里 周制
封王者後九有功之諸侯大者地方五百里侯四百里伯三百
里子二百里男百里 凡諸侯世子世國大夫不世爵使人以
德爵以功未賜爵視天子之元士以君其國 秦制爵二十等

以賞功勞二十徹侯十九關內侯劉昭曰關內侯無土寄食在
兩縣民租多以 漢典設爵二等曰王曰侯皇子而封為王者
其實古諸侯也故謂之諸侯王王子弟封為侯者謂之諸侯郡
臣異姓以功封者謂之徹侯大者不過萬家小者五六百戶古
分土而無分民自漢始分民 漢初論功封列侯者凡百四十
有三人大者食縣食鄉亭得臣其所食吏民食邑者除租每戶
一歲更輸錢二百 後漢爵亦二等以肺腑及公主子孫或奉
墳墓亦為獲諸侯明帝為四姓小侯開立學校置五經師 獻
帝封曹操為費亭侯其侯之制自此始也 唐有國正郡王國
公郡公開國郡公縣公開國侯伯子九等 周易我有好爵

吾與爾縻之 書曰爵罔及惡德惟其賢 周禮公執桓圭侯執信圭伯執躬圭子執穀璧男執蒲璧 逸周書曰能移於衆與百姓同謂之公能樹名生物與天道俱謂之侯齊衆時作謂之伯 白虎通曰王者即位先封賢者憂民之急也故列土分疆非為諸侯張官設府非為卿大夫皆為民也 管子曰爵不尊祿不重者不與圖難犯危以其道為未可以求之也是故先王制軒冕足以著貴賤不求其美設爵祿足以守其服不求其親使君子食於道小人食於力 淮南子曰爵祿者人臣之銜轡也 環濟要略曰爵有五等公者無人也故文背公為公伯把也把持政事也子猶孳孳恤下之稱也男任也任治政事受

王命為君也 白虎通必封諸侯何重民之至也善惡比而易知故擇賢而封使治其民以著其德極其才上以尊天子稱藩輔下以子養百姓施行其道 晉書云周道興隆三聖制法立爵五等封國八百親親建國則周公宅魯賢賢表德則太公封齊 史記封爵之誓曰使黃河如帶泰山若礪國以永寧爰及苗裔 周禮以九儀之命正邦國之位一命受職再命受服三命受位四命受冠五命賜則六命賜官七命賜國八命作牧九命作伯 白虎通爵人於朝者示不私人以官與衆共之義也封諸侯於廟者示不自專也明法度皆祖之制也舉事必告焉禮記封諸侯以夏何陽氣盛養故封諸侯盛養賢也封立人

君陽德之盛者 諸侯有功則益地取閑田而益之有罪則削地削地歸之閑田 不合於天子於諸侯曰附庸 成王始躬政事以周公為太師封伯禽于魯父子並命周公拜於前魯公拜於後 白布通王者始封諸父昆弟示與已共財之義

封功

周官司勲掌六卿賞地之法以等其功焉 王功曰

勲國功曰功事功曰勞治功曰力戰功曰多凡有功者銘書於王之太常 史記功有五品以德立宗廟定社稷曰勲以言勞用力曰功明其等曰伐積日曰閱 漢書高祖功臣侯者子孫驕逸多陷法禁孝武元狩中復封蕭何曾孫慶為鄼侯成帝復紹蕭何而哀平之時復曹參周勃之後 元康四年立斬翕夏

侯嬰陳平張良周勃等一百一十八人後詔爵復家也 **封汾陽**

李光弼兵敗河陽失守河中軍亂殺其帥李國貞遂用郭子儀進封汾陽郡王出鎮絳州子儀擒其殺國貞賊首王元振等

數十人並誅之諸鎮悉皆奉法 **封咸寧** 渾瑊父釋之積戰功

至寧朔郡王德宗幸奉天瑊率家人子弟以拒朱泚賊平封咸

寧郡王 **封北平** 馬燧少讀書輟卷歎曰丈夫當建功於代以

濟四海安能矻矻為一儒哉朱泚之亂以功封北平郡王 **封**

鄉亭 光武封功臣各言所樂諸將皆占豐邑羨縣惟丁綰

願封本鄉曰昔叔孫敖救其子受封必受境埒之地今綰能薄功微得鄉亭侯足矣 光武封景丹櫟陽侯曰富貴不歸故鄉

如衣繡夜行故以封卿耳**封安豐** 詔曰竇融執志忠孝扶微
救危仇疾反虜隗囂率勵五郡精兵兵不血刃而虜土崩尾解
朕甚嘉之封為安豐侯**封侯相** 相者謂班超曰生燕領虎頭
飛而食肉萬里侯相也 南史相工指呂僧珍曰此兒有奇祥
封侯相也 宋明帝目李安仁曰卿面方如田封侯相也**勿**
封侯 隋李崇以父賢勲封迴樂縣侯時年尚小親族相賀崇
獨泣賢怪而問之對曰無勲於國而幼小封侯當報主恩不得
終於養是以悲耳賢由是大奇之**封侯之瑞** 王敬則少時射
獵有虫如烏頭集其身摘去乃脫脫處皆流血敬則惡之道士
曰此封侯之瑞後封重安縣子 齊書

歷代

自西漢至宋略記帝王享國年數及年號借竇切之
國不能盡記略叙大者于末端

西漢	高祖 姓劉名邦 在位十二年	惠帝 盈 七年
文帝 恒 二十三年	景帝 啓 十六年	武帝 徹 五十四
年 始建年號	建元 元光 元朔 元狩 元鼎 元封	
太初 天漢 太始 征和 後元	昭帝 弗陵 十三年	
始元 元鳳 元平	宣帝 病已改名詢 二十五年	本始
地節 元康 神爵 五鳳 甘露 黃龍	元帝 爽 十卒	
初元 永光 建昭 竟寧	成帝 騫 二十六年	建始
河平 陽朔 鴻嘉 永始 元延 綏和	哀帝 欣 六年	

建平 元壽 平帝 箕子改名衍 五年 元始 孺子二年

東漢 世祖光武 秀 三十三年 建武 中元 明帝 陽改

名莊 十八年 永平 章帝 烜 十三年 建初 元和

章和 和帝 肇 十七年 永元 元興 殤帝 隆八月

延平 安帝 祐 十九年 永初 元初 永寧 建光

延光 順帝 保 十九年 永建 陽嘉 永和 漢安

建康 沖帝 炳 三月 永嘉 質帝 續 一年半 本初

桓帝 志 二十一年 建和 和平 元嘉 永興 永壽

延熹 永康 靈帝 宏 二十二年 建寧 熹平 光和

中平 獻帝 協 三十一年 初平 興平 建安

蜀漢 昭烈 備 三年 章武 後帝 禪 四十一年 建興

延熙 景耀 炎 興 自高祖至後帝凡二十六世四百六

十九年 呂后八年 王莽十五年 更始二年在 中

西晉 武帝 姓司馬 名炎 二十六年 泰始 咸寧 太康

惠帝 衷 十七年 永熙 永康 永寧 太安

永興 光熙 懷帝 熾 六年 永嘉 愍帝 業 四年

建興 東晉 元帝 睿 六年 建武 大興 永昌 明帝 紹

三年 太寧 成帝 衍 十七年 咸和 咸康 康帝 岳

二年 建元 穆帝 聃 十七年 永和 升平 哀帝 丕

四年隆和興寧帝奕六年太和簡文帝昱

九月咸安孝武帝昌明二十四年寧康太元

安帝德宗二十二年隆安元興義熙恭帝德

二年元熙自武帝至恭帝凡十五世一百五十五年

宋高祖姓劉名裕三年永初晉陽王義符二年

景平文帝義隆三十年元嘉孝武帝駿十一年

孝建大明廢帝子業一年景和明帝彧八年

泰始泰豫廢帝昱五年元徽順帝準三年

昇明自高祖至順帝凡八世五十九年

齊高祖姓蕭名道成四年建元武帝曠十年

永明廢帝紹業一年隆昌廢帝昭文四月延興

明帝鸞五年建武永泰東昏侯寶卷二年

永元和帝寶隆一年中興

自高祖至和帝凡七世二十三年

梁武帝姓蕭名衍四十八年天監普通大通

中大通大同中大同太清簡文帝綱三年

大寶元帝繹三年承聖敬帝方智三年

紹泰自武帝至敬帝凡四世五十五年

陳高祖姓陳名霸先三年永定文帝蒨七年

天嘉天康臨海王伯宗二年光大宣帝頊

十四年 大建 **後主**叔寶七年 至德 禎明

自高祖至後主凡五世五十五年

隋 **文帝**姓楊名堅 二十四年 開皇 仁壽 **煬帝**廣

十二年 大業 **恭帝**侑半年 義寧

自文帝至恭帝凡三世三十八年

唐 **高祖**姓李名淵 九年 武德 **太宗**世民二十三年

貞觀 **高宗**治三十四年 永徽 顯慶 龍朔

麟德 乾封 總章 咸亨 上元 儀鳳 調露 永隆

開耀 永淳 弘道 **中宗**顯改名哲即位二月武后廢之居

均州一年在房州十三年還為太子七年復位六年通二十

七年 嗣聖 神龍 景龍 **睿宗**旦為帝者七年為周嗣

者九年封相王者十年復位三年 景雲 太極 **玄宗**隆基

四十五年 先天 開元 天寶 **肅宗**璵改名亨七年

至德 乾元 上元 寶應 **代宗**俶改名豫 十七年

廣德 永泰 大曆 **德宗**适 二十六年 建中 興元

貞元 **順宗**誦八月 永貞 **憲宗**純 十五年 元和

穆宗恒四年 長慶 **敬宗**湛 二年 寶曆 **文宗**涵

改名昂 十四年 太和 開成 **武宗**瀝改名炎 六年

會昌 **宣宗**怡 十三年 大中 **懿宗**溫改名漼 十四年

咸通 **僖宗**儇 十五年 乾符 廣明 中和 光啓

文德 **昭宗** 僖改名敏又改驊 十六年 龍紀 大順

景福 乾寧 光化 天復 天祐 **昭宣帝** 林改名祝

四年 仍稱天祐 自高祖至昭宣凡二十世三百九十

年武后十六年在中

梁 **太祖** 姓朱名溫改全忠又改晃 六年 開平 乾化

均王 友貞 十一年 貞明 龍德 凡二十世十七年

唐 **莊宗** 存勗 三年 同先 **明宗** 嗣源 八年

天成 長興 **閔帝** 從厚 數月 應順 **廢帝** 從珂

本姓王 三年 清泰 凡四世三姓十四年

晉 **高祖** 姓石名敬瑭 八年 天福 **出帝** 重貴

五年 開運 凡二世十二年

漢 **高祖** 姓劉名知遠 二年 乾祐 **隱帝** 承祐 二年

凡二世四年

周 **太祖** 姓郭名威 三年 廣順 **世宗** 榮 姓榮

六年 顯德 **恭帝** 宗訓 半年 凡三世二姓十年

宋 **太祖** 姓趙名匡胤 十七年 建隆 乾德 開寶

太宗 匡義改名炅 二十二年 太平興國 雍熙

端拱 淳化 至道 **真宗** 元侃改名恒 二十五年

咸平 景德 大中祥符 天禧 乾興 **仁宗** 禎

四十二年 天聖 明道 景祐 寶元 康定 慶曆

皇祐至和 嘉祐 **英宗** 宗實改名曙 四年 治平
 神宗項 十八年 熙寧 元豐 **哲宗** 煦 十五年
 元祐 紹聖 元符 **徽宗** 佶 二十六年 建中靖國
 崇寧 大觀 政和 宣和 **欽宗** 桓 二年 靖康
 南宋 **高宗** 構 三十六年 建炎 紹興 **孝宗** 昀
 改名育 二十七年 隆興 乾道 淳熙 **光宗** 惇 五年
 紹熙 **寧宗** 擴 三十年 慶元 嘉泰 開禧 嘉定
理宗 與嘗改名貴誠又改昀 四十年 寶慶 紹定
 端平 嘉熙 淳祐 寶祐 開慶 景定 **度宗** 孟啓
 改名孜又改權又改釐 十年 咸淳 **恭帝** 昀 二年

德祐 **端宗** 昀 三年 景炎 **帝昺** 二年 祥興

自太祖至帝昺凡十八世三百二十六年

魏 文帝姓曹名丕 明帝睿 邵陵厲公芳 高貴鄉公
 髦 陳留王奐 凡五世四十六年亡于晉
 吳 大帝姓孫名權 會稽王亮 景帝休 烏程侯皓

凡四世五十九年亡于晉

北魏 烈祖姓拓拔名珪稱帝於東晉孝武之世 太宗嗣
 世祖太武帝壽 高宗濟 獻文帝弘 高祖孝文帝宏改
 姓元 宣武帝恪 孝明帝詡 孝莊帝子攸 節閔帝恭
 自烈祖至是百四十九年而分為東魏西魏

西魏 孝武帝脩 文帝寶炬 廢主欽 恭帝廓梁敬帝
時禪于周 凡四世二十三年

東魏 孝靜帝善見 梁簡文帝時禪于齊 建國十七年

後周 孝閔帝姓宇文名覺 安之公泰之子 明帝毓 武

帝邕 宣帝贇 靜帝闡 禪于隋 凡五世二十五年

北齊 文宣帝姓高名洋 歡之次子 濟南王殷 孝昭帝

演 武成帝湛 後主緯 陳宣帝時亡于周

凡五世二十八年

南唐 李昇為徐溫養子 名知誥 受吳禪 復姓李氏 更名昇
自謂唐後國 號唐 傳子璟 孫煜 亡于宋 凡三十九年

遼 太祖阿保機 姓耶律 梁均王時稱帝 太宗德光 世

宗元 欽 穆宗述 律 景宗賢 聖宗隆緒 興宗宗真

道宗弘基 末主天祚 宋徽宗時亡于金

凡九世一百九十年

金 太祖阿骨打 姓完顏 宋徽宗時稱帝 改名旻 太宗晟

閔宗亶 海陵王亮 世宗哀 改名雍 章宗璟 東海侯

允濟 宣宗珣 哀宗守緒

凡九世一百十七年

元 太祖鐵木真 姓奇渥溫 宋寧宗時稱帝 太宗窩闊台

定宗貴由 憲宗蒙哥

世祖忽必烈 三十五年 中統 至元 成宗鐵木耳

十三年 元貞 大德 武宗海山 五年 至大

仁宗愛育黎拔力八達 九年 皇慶 延祐 英宗碩德

八剌 四年 至治 泰定帝也孫鐵木兒 五年 泰定

致和 明宗 和世球 八月未及改元 文宗圖帖穆爾

五年 天曆 至順 寧宗懿璘質班 月餘 順帝妥懽

帖睦爾 三十六年 元統 至元 至正

自太祖至順帝九十四世一百六十三年紹正統八十

九年

類苑叢寶卷之八

